

Naskanyam Korinto Leta

Polimna Iriki Naskanyam Korinto

Sosim pilwa Leta

Isipkita Yitkak

Onggityam leta irika riga re Polte. I ton itemb leta yirikonj re Korinto sosi mana rika gibil win nat A.D. pipti paib (55) kemagind.

I re Pol yibnonj Epeso taunind, kea ton yipa leta yokatonj Korinto sosim pilke. Seg todaka ket mira leta erikawonj Korinto sosim pilwa. Si intemb ji leta rinte re men nyi yogenayu da Naskanyam Korinto Leta.

I onggit winind Korinto re yipa ukoi jog Grik taun na dide mop tungg na yibnonj Akaya eriyand. I dide itemb taun yibnonj re yipa ongwatijog wulkip dide gasa jogjog taun na i dide negirjog b'iyena mile kima taun na.

Si Pol ma sobijog na itemb Korinto sosind nony kubir yomnikonj, nokip kea jogjog negir mile ukuka wuwenonj onggit sosi wingirind. Si Pol ukoi jog nony kubir ainy re onggit bebigin pilnasim, opi re b'u b'iyena mile, i negirjog b'iyena mile, i molkongga wimena mile gatab b'arkita, i kukip ke nonykok mile gatab yit, i b'obogil sosi ongonjena yit, i Yinayina Wingawingamna yiyag wurar gatab yit, i dide utnyita gatab yit. Si onggit mop penaemb ket onggit peband Pol samany iyowa eyeninonj dide singi kima ouyaena eyeninonj b'obogil wimenam Godimna yitkak ririrind.

Simesime Yitkak

¹ Simesime! Kon Pol ten rina re God Tina singind ara nemokonj Yesu Kerisomna itmikitijog rigam. A si kon koina gar ke utkunda yinggan Sostene kima e wanim peba yirikya, ² God ma sosim pilwa rinte re yibim Korinto taunind i yepiya re win onggit sosind Yesum pilke yina aukitondam, si ket yina riga im wekenyit, i kwa komkesa yina riga wa pilwa yepim re mera Yonggyam Yesu Kerisond towa Yonggyamim nyi yogenai komkesa eriya wingirind. ³ Wurar dide ngimbla win kima mera B'u Godim pilke dide Yonggyam Yesu Kerisom pilke.

Godim pilwa Siteket Yit

⁴ Win Keriso Yesum pilnasim wekenyit, si God wa wurar agoneneniny. Si onggit paemb kon koina Godind wa gatab siteket yit yomnikenenyin ita winind. ⁵ Mop nokip win komkesa gatab ke ririrkipjog im wekenyit Yesund yimta undokand komkesa opurena ke dide komkesa wumir ke. ⁶ Nokip Kerisom gatab yir ungata yit re kea wa pilind imjati e yibim. ⁷ Si onggit paemb win ma opima oraka eyenindam nanggamog wingawinga ke yiyag wurar aji win nony b'ogil kima yir ungawa nasim wekenyit mera Yonggyam Yesu Kerisomna liyalliyal menon. ⁸ Si mera Yonggyam Yesu Keriso, Tontemb kwa danda kima wen imjatena teyeniny ngirpu undwatapu win. Nokim da idenat win b'injawa kesa riga taindam dem Tina menon bibirind. ⁹ I God wen ara emokinonj re yipand yingg okatena mana Tina B'iga Yesu Keriso mera

Yonggyam kima. Si onggit paemb Ton kwa opima iminjogjog tamnikiny Tina yitkak ririrind.

Sosind Bu B'iyena Mile

¹⁰ Gar ke utkunda nany dide yingganwar! Kon wen danda kima tugoinyin mera Yonggyam Yesu Kerisomna nyi kima im. Si komkesa win b'ogla yipaina gasand injati yit tapurenindam dide goro bu b'iyena mile ke wetaweta tekenyit wa wingirind. Aji win b'ogla waina gar dide waina nony menamena tangapindam yipand awowim. ¹¹ Mop nokip, kor gar ke utkunda nany dide yingganwar, Kloemna b'ubigawar wingirind nindap kea ken wumir nomno da wa wingirind opima leny b'agawa mile. ¹² Aji odede mop penaemb kon ninjin da win wa wingirind opurena eyenindam da, “Kon re Polim tab ke riga en,” i yipat da, “Kon re Apolom tab ke riga en,” i yipat da, “Kon re Petrom tab ke riga en,” i dide kwa yipat da, “Kon re Kerisom tab ke riga en.” ¹³ Si rika Keriso kib omniki e yibim? I rika Polit wanim uj awonj wul b'agbagind? I rika win kwa Polimna nyi kima na baptiso yokatenonda? Nayi. ¹⁴ Si kon onggit paemb Godind siteket yit yomnenyini da kon makwa yena baptiso yomnond wa wingirind, aji Krispo ake Gaiyo nena na. ¹⁵ Nokim da idenat maka yet indeny da, “Kon Polimna nyi kima na baptiso yokatond.” ¹⁶ Si kon kwa kea Stepana b'ubigawar baptiso amnikinond, aji kon ma wumir en rika kon ke yena riga baptiso amnikinond. ¹⁷ Mop nokip Keriso ma ken baptiso omnika mana nitmikitonj wa pilwa, aji God ma b'ogil yirkokar bage yit pitapita omnena mana. Si

kon ma nony b'akatena kima opurenam multekip na yingaenenond, nokim da idenat Kerisomna wul b'agbag maka kip kesa tawik.

Godimna Multekip dide Wul B'agbag

¹⁸ Mop nokip wul b'agbag gatab yitkak re korirkorir opurena yitkak e towanim yepiya ra negir okatenyi dem. Aji yepiya ra men yirkokar okasu dem itemb wul b'agbag gatab yitkak re Godimna danda e meranim. ¹⁹ Mop nokip yina peband ija emb ji iriki yibim da,

“Kon opima negir tamnikeninyin b'ogil multekip rigaina multekip.

I Kon kwa opima awir tamnikeninyin b'ogil wumir rigaina wumir.”

²⁰ Si rokate b'ogil multekip riga yibim? I rokate b'ogil wumir riga yibim? I kwa rokate b'ogil yit b'irmeka riga yibim? Awir e. Ma si God kea onggityam gowukoyimna multekip korirkorir amninonj? Owi. ²¹ Mop nokip God kea Tina multekip ke gowukoi rigaina multekip edokinonj Tinim wumir okatam. Si Godimna wiko rigaina pitapita omnene Tina b'ogil yirkokar bage yit re korirkorir yitkak e gowukoi rigaina multekip ke ongwatam. Aji God opimemb korirkorir yitkak sam kima e yingaeneny riga wa yirkokar okawam yepiya ra gar ke utkunda ke onggityam yitkak okatenyi. ²² Si Ju rigap b'arkena yoramitenyi re kid kesa kima danda wiko mim onggityam yitkak imjatam. I dide kwa Grik rigap onggityam yitkak imjatam oraka yiyenyi re towaina multekip ke ongwata mim. ²³ Aji sin Keriso na pitapita yomnenyu yena re wul b'agbagind yidriko. Si

onggityam yitkak re b'uwombenapu e Ju riga wa, i daka God ma obagiki kesa riga wa re korirkorir e. ²⁴ Aji Keriso re Godimna danda e dide Godimna b'ogil multekip e towanim yena re God ara emokinonj Ju riga wa wingirind dide Grik Riga wa wingirind. ²⁵ Mop nokip Godimna multekip rinte re rigap yogenaenenyi korirkorir ke re ton b'ogil multekip e yibim riga wa wipind. Aji rigaina b'ogil multekip re ma b'ogil multekip e yibim Godim wipind. I Godimna danda rinte re rigap yomnenenyi sobijog ke re ton ukoi jog danda e riga wa wipind, aji rigaina ukoi jog danda re sobijog danda e Godim wipind.

²⁶ Si kor nany dide yingganwar, win b'obogil nonyik b'amdeninam wa gatab re God wen ara emokinonj. Si gim ke gowukoi rigaina nya ke re win ma jog na wekenot b'ogil multekip riga i ma jog na gim ke danda kima riga i dide ma jog na pumbjog nyi riga. ²⁷ Aji God Tina riga abagikinonj yepiya re gowukoi rigap korirkorir ke agenaento, nokim da idenat Ton ingarind taramiteniny b'ogil multekip kima riga. I kwa God Tina riga abagikinonj yepiya re gowukoyind danda kesa wekenonj, nokim da idenat Ton ukoi danda kima riga ingarind taramiteniny. ²⁸ Si God obagika eyeniny re gowukoyimna goujog nyi riga im dide isai riga im. Si nok paimemb Ton odede riga obagika eyeniny yepim re ongwati kesa riga wekeny gowukoyind, nokim da idenat ten teomneniny yepim re ongwati riga wekeny gowukoyind. ²⁹ Si God odede mile omnika eyeniny re nok mim da idenat komkesa riga maka b'atisourenanj Ti wipind. ³⁰ Aji win re Godim

pilkaim dide Keriso Yesum pilnasim wekenyit. I Keriso re Godim pilkena ikonj dide meranim b'ogil multekip na awonj. Si Ton re meranim negir kesa dimdimjog e i yinayina e i dide negir milem pilke itringendam mira e. ³¹ Si onggit paemb yina peband ija emb ji iriki yibim da, “Yet ra singi tainy b'asourenam, ton b'ogla Yonggyam nenam pilind b'asouren.”

2

Kerisomna Wul B'agbag gatab Yit

¹ Gar ke utkunda nany dide yingganwar! Re kon naskajog nekond wa pilwa, kon kea Godimna iminjog yirkokar yitkak wa pitapita amnenawond. Aji kon koina opurena maka engaeninond b'ogil isakaurena kima yitkak dide b'ogil multekip ke yitkak. ² Mop nokip re kon wimena nekenond wa wingirind, kon kea kolenggyam yimjatond da, “Kon komkesa gasa nony redasinin, aji kon ina pitapita ramnenin Yesu Keriso dide Tina uj gatab wul b'agbagind.” ³ I kwa kon win kima nibnenenond re danda kesa wingir nat i moga wingir nat i dide ukoi kaktiti kima wingir nat. ⁴ Si koina ouyaeni yitkak dide koina pitapita omnene yitkak re ma rigaina b'ogil multekip ke il onγκα yitkak na. Aji Yinayina Wingawingat danda kima utkunda rigaina gar akateninonj. ⁵ Si kon onggit penaemb odede mile yomnikenenond, nokim da idenat waina gar ke utkunda maka tekeny rigaina multekipim pilind, aji tekeny ra Godimna dandam pilnasim.

Godimna B'ogil Multekip

⁶ Aji men re b'ogil multekip gatab e opurena yiyenyu towa pilwa yepim re wingawinga ke rigajog owinki wekeny. Aji itemb b'ogil multekip re ma onggit gowukoyim pilkae dide ma onggityam gowukoi wip iyoi riga wa pilkae rinte ra b'eteomnenny. ⁷ Aji re God maka gowukoi yotobarkonj, Ton kea naska nata meranim b'ogil inyomarena okatam yisamkonj onggit b'ogil multekip gatab rina re wigawiga egiti yibnenenonj. Si men ket intemb ji Godimna b'ogil multekip gatab opurena yiyenyu. ⁸ Si onggit gowukoi wip iyoi riga wingirind makwa yipat wumir yokatonj Godimna itemb b'ogil multekip gatab. Mop nokip rako ton wumir yokato, ton ma rako b'ogil inyomarena kima Yonggyamind yidriko wul b'agbagind. ⁹ Aji yina peband ija emb ji iriki yibim da,
 “God gasa angonjeninonj towanim mana yepim re
 Tin singi yiyenyi.

Si makwa yipa rigat onggityam gasa yir anginonj tina yirkip ke.

I makwa yipa rigat onggityam gasa gatab utkundeninonj tina yipya ke.

I dide makwa yipa rigat onggityam gasa nonyik epindeninonj tina gar ke.”

¹⁰ Aji Godit Yinayina Wingawingand yingaenonj men ouyaukuran onggityam wigawiga gasa. Mop nokip Yinayina Wingawinga re komkesa gasam dide Godimna ngor wa wigawiga egurki gasa gatabim wumirjog e yibim. ¹¹ Mop nokip riga wingirind ita yete wumir yibim yipa rigamna komkesa gar ke gasa gatab? Nayi, makwa ita yete, aji onggit rigamna wingawinga nena ta

wumir yibim yete re ti pilind yibim. Si odede yipa wip nya ke makwa yipat ita wumir yibim Godimna komkesa gar ke gasa gatab, aji Godimna Wingawinga nena ta wumir yibim. ¹² Si men yokatonda re ma gowukoyimna wingawinga na, aji Godim pilke Wingawinga na. Nokim da idenat men wumir taukindam komkesa gasa gatab rina re God mera yiyagiyag nogoninonj. ¹³ Si men apurenindam onggityam komkesa gasa gatab re ma rigaina b'ogil multekip ke ouyaeni yitkak kaim, aji Yinayina Wingawingamna ouyaeni kaim. Si men wingawinga gasa gatab esipkenaindam re towanim mim ya pilnate re Yinayina Wingawinga b'imuri yibim. ¹⁴ Aji riga ya pilnate re maka Yinayina Wingawinga b'imuri yibim, ton ma opima takasiny onggityam komkesa gasa rinsim re Godimna Wingawingam pilke wuweny. Mop nokip opimemb re tinim korirkorir gasa im. Si ton ma ririr e wumir okatam nokip rigap onggityam gasa angwatananj re wingawinga nya nena kaim. ¹⁵ Aji ya pilnate re Yinayina Wingawinga b'imuri yibim, ton ririr e onggityam komkesa gasa tekalneniny ongwatam. Aji makwa yipa rigat ririr e tin isagik ongwatam. ¹⁶ Si yina peband ija emb ji iriki yibim da, "Yete wumir yibim Yonggyamimna gar, i ton ket Tin ugou?" Aji men re kea Yonggyam Kerisomna gar e okati yowamu.

3

Wingawinga ke Papa B'iga

¹ I kor nany dide yingganwar, kon ma ririr na opurenam awond wa pilwa odede it re kon

apureninyin towa pilwa yepim re wingawinga ke rigajog owinki wekeny. Aji kon ija na wip wen yit amninond opi re gim ke gowukoi riga re dide o papa b'iga re dide yepim re Yesund gar ke utkunda ke yokasi. ² Si kon wen okika eyeninond re ngom mebo kena, aji maka angeninond owoujog ke. Mop nokip win re ma ririr na aukitondam onggityam owoujog owowim, aji daka kwa yu ke win ma ririr im. ³ Mop nokip win wekenyit re gim ke gowukoi riga im-a ngirpu yu. Si wa wingirind opima nonyik b'iponena mile dide leny b'agawa mile. Si rika win ma gim ke gowukoi riga im-a wekenyit? Dide rika win ma gowukoi rigaina mile ririr nasim wimena wuwenyit? ⁴ Si ra wa wingirind yipa rigat b'atgenai, i ton bu b'iyena yit indeny da, "Kon re Polim tab ke riga en," i kwa yipat da, "Kon re Apolom tab ke riga en." Si ringma, ma win gowukoi riga im-a wekenyit?

Godimna Wikomadwar

⁵ Si yete ji Apolo? I daka yete ji Pol? Sin re Godimna wiko riga i ya pilkena re win gar ke utkunda yokatonda. Si sin yipayipa ina wiko omnika eyeninonda rina re Yonggyam sowa noka-wonj omnikam. ⁶ Si kon tuny esinond i Apolo daka nyi isanka eyeninonj. Aji Godit ket owinka eyeninonj. ⁷ Si onggit paemb itot riga re ma ukoi e i daka nyi isanka riga kwa ma ukoi e. Aji God yet re owinka eyeninonj re ukoi jog e. ⁸ I itot riga ake nyi isanka riga re yipa ririr wiko riga i ebnya. Aji ton yipayipa towainajog mira takasinya ra dem towainajog b'asowa ririr nasi. ⁹ Mop nokip sin re

Godimna wikomad i nibnya. I win re Godimna sopapu im dide Godimna met im.

Met Oranga gatab Tendam Yit

¹⁰ Si God kea wurar nokawonj i kon onggit wurar ririrind met orangapu pipmet yispikond b'ogil multekip kima met oranga riga re dide. Aji kwa ninda rigap daka ket ita met oranga yiyenyi onggit ispiki met orangapu pipmet kumbind. Si ton yipayipa b'ogla b'obogil yir yeyene ridede e ton onggityam ispiki met orangapu pipmet kumbind b'obogil met oranga iyenyi. ¹¹ Mop nokip met orangapu pipmet re kea ispiki e, si makwa yipa rigat ririr e b'enga met orangapu pipmet ispik. Si itemb met orangapu pipmet isipkitam re Yesute. ¹² Si ra met oranga rigap onggityam met orangapu pipmetind met oranga iyenyi, ton ririr im odede gasa ingaenam, opi re gold, i silba, i b'ogil ngindngind gimo, i wul i tib, i dide papar. ¹³ I yipayipa rigaina omniki wiko opima pita taukanj dem, mop nokip b'isagika bibirte wul ke imbrika ke pita wa tamnikiny dem. Si onggit wulte yipayipa rigaina omniki wiko tatonkeniny dem ridede wip wiko im. ¹⁴ I ra onggit wulit maka imbrik dem yipa rigamna wiko ke orangi met, ton ita b'ogil mira okas dem. ¹⁵ I ra wulit tina wiko ke orangi met imbrik, ton makwa ita b'ogil mira okas dem. Aji ton tilenggyam ita yirkokar okas dem, aji odede wip e dem it re wul dimil wingir ke edata re dide. ¹⁶ Si ma win wumir im da win re Godimna yinamet im dide Godimna Wingawinga wimena yikeny re wa wingir nate? ¹⁷ I yet ra Godimna yinamet negir omnik, God ita onggit rigand negir

omnik. Mop nokip Godimna yinamet re yinayina e yibim. Si widaka re onggityam yinamet im.

Komkesa Gasa re Godimna im

¹⁸ Goro yipa rigat molenggyam b'atinyginenim! Wa wingirind yet ra man nonyik b'atimdenyit da, “Kon re b'ogil multekip riga en onggit gowukoyind,” si man b'ogla korirkorir riga ae! Nokim da idenat man ket iminjog b'ogil multekip riga taet. ¹⁹ Mop nokip onggit gowukoyimna b'ogil multekip re Godim wipind korirkorir e. Nokip yina peband ija emb ji iriki yibim da, “God gowukoi b'ogil multekip riga imda eyeniny re towaina multekip ke rabem b'amnena mile kaim.” ²⁰ I kwa b'usaya yindeny da, “Yonggyam gowukoi b'ogil multekip rigaina nonyik b'amdena wumir e yibim odede da opimemb re kip kesa im.” ²¹ Si onggit paemb win goro b'atisoureninam riga wa gatab. Mop nokip komkesa gasa wekeny re wa mima. ²² Pol, i Apolo, i Kepa it re Petro, i gowukoi, i yirkokar, i uj, i yunim gasa, i dide warim gasa, opimemb komkesa re wa mima. ²³ I win re Keriso mima, dide Keriso re God ma.

4

B'isagika gatab Yit

¹ Si riga, win b'ogla sin nongwasinam da sin re Kerisomna wiko riga im dide mopyam wiko riga im Godimna wigawiga yirkokar yitkak yir ipkam. ² Si onggit paemb onggit mopyam wiko rigap b'ogla b'obogil dimdim wiko nena ramnikinem, nokim da idenat towa Yonggyam temjatenainy towaina nony b'ijawa mile. ³ Si kon ma ita nony kubir

taen, nokip onggityam re sobijogjog gasa e, ra win ken nitisagikya, o ra rigap ken nitisagiki. I koda kwa ma ita kolenggyam b'isagika mile omniken kor gatab. ⁴ Mop nokip kon kolenggyam iminjog wumir yokasin da awir e kwa negir kor pilind. Aji kon ma onggit kaemb negir kesa dimdimjog riga taen Godim wipind. Si Yonggyamta ji riga yete re ken nisagikeny imjatam. ⁵ Si onggit paemb win goro naskanaska ya pilnat imjatenam b'isagika mile taramiteninam, ngirpu de onggit winind ra Yonggyam ik dem. Ra Yonggyam ik dem, Ton ita komkesa sibibind egurki gasa ngaya pitand tamniny dem. I Ton pita wa tapekiny dem rigaina garind egurki mile. Si onggit win natemb dem God riga yipayipa esourena tagoniny dem towaina pita omniki mile ririrind.

B'asourena gatab Samany Yit

⁶ Gar ke utkunda nany dide yingganwar! Kon onggityam yitkak wingata ke kor pilind dide Apolom pilind aramiteny in re wanim b'obogil nony auka mim. Nokim da idenat win sowa pilke b'atouyaenindam odede yitkak rinte re yindeny da, "Goro igwantim yina peband iriki yitkak." I ingkaemb win maka yipa rigand esourenya dide yipand daka isaya. ⁷ Si yet ukoi jog rigam men mimjatonj? Ma man ke komkesa gasa emjinot Godim pilke rinsim re man awaminyit? Si rada man kea Godim pilke emjinot, si ridede pae man asoureninyit odede wip da man maka emjinot? ⁸ Si win opima amaya nonyik b'amdenindam da win kea ngor im wekenyit, i kea jogjog gasa kima im wekenyit, i dide win kea sowa kesa ke kingim

aukindam. Si kon singi en pop da win rako iminjog kingim aukindam, nokim da idenat sida kwa win kima yipand gilgil kingim taukindam. ⁹ Mop nokip koina nony menamena ke ija e wip awik da God sin itmikitijog riga kikitumpu wa pita wa non-drasiny re odede im opi re riga bajbajind uj ma b'isagika okatam riga re dide. Si sin re itabina riga im aukindam kupka gowukoyim, i aneru wa i dide riga wa. ¹⁰ Si sin re Keriso map korirkorir im wekenyın, aji win re depemop im wekenyit Kerisom pilind. I sin re danda kesa im wekenyın, aji win re danda kima im wekenyit. I kwa win re b'ogil isnawa kima riga im wekenyit, aji sin re isnawa kesa riga im wekenyın. ¹¹ Si ngirpu otade winind, sin re owoupa dide nyipa nasim wekenyın, i gujgij kobirgim kima im wekenyın, i ipowakip nasim wekenyın, i dide met tib kesa im wekenyın. ¹² I sin sowainajog yim kaim wikom b'asowa wuwenyın sowalenggyam yir b'ipkam. I sin b'ogil omna yit ke ten amnikenindam yepim re ji malik nomnikenenanj. I sin mimkam wimena wuwenyın towa wipind yepim re sowa pilind bebig kima b'idgotnena aramkenenenanj. ¹³ I sin ten b'ogil yit ke ugoenenindam yepim re negir yit ke nomnenenanj. Si sin gowukoyimna au pila dide komkesa gasa waina pipla pila im aukenenindam ngirpu otade winind.

Polimna B'ugowa Yit

¹⁴ Si kon itemb peba yiriken re ma nok mim da win ingar taukindam, aji nok mim da kon wen nonony tamninyın koina singi iyena b'igawar pila.

¹⁵ Mop nokip nangga ma ji rada wa opima ten

tausin (10,000) yir ipka dide ouyaena riga ebnainy Kerisom pilind, aji wa ma jog b'u im ebnainy. Mop nokip kon God ma b'ogil yirkokar bage yit pitapita omnena ke wa b'u awond Keriso Yesum pilind. ¹⁶ Si onggit paemb kon wen ugoinyin da win b'ogla koina wingata ririrind aukina. ¹⁷ I onggit mop penaemb kon wa pilwa Timotend yitmikitond. I ton re koina singi iyeni b'iga e dide Yonggyamim pilind re nony ijai riga e. Si tontemb wen nonony tamniny dem koina yirkokar wimena gatab Keriso Yesum pilind. Si itemb ji koina wimena yirkokar da kon opima riga ouyaena eyeninyin komkesa eriya nata i komkesa sosi nata. ¹⁸ Si wa wingirind ninda rigap opima b'asourena wuweny odede nony menamena kima da kon ma ita neken wa pilwa. ¹⁹ Aji ra Yonggyam singi tainy kornim menon wa pilwa, kon ita wanakana neken wa pilwa. I kon ma b'asourena rigaina opurena yitkak im oraka teyeninyin dem, aji kon oraka teyeninyin dem towa pilke inte da rika towa opima Godim pilke danda ebnainy. ²⁰ Mop nokip God ma pumb tungg yibim re ma yitkak opurenam pilnate aji Godimna dandam pilnate. ²¹ Si nangga e win singi yomnya? Rika kon komliu kima e neken wa pilwa, o minda singi b'iyena mile dide nony kima musik wimena mile kima e neken?

5

Negir B'iyena Mile gatab Yit

¹ Si iminjog e itemb re imjatam bebig e waina b'agenaya yitkak gatab da wa wingirind opima negir b'iyena mile wekeny. Si yipa rigat ti b'uimna kongga kima negir b'iyena milend wimena yikeny.

Si daka odede ti b'uimna kongga kima negirjog b'iyena mile re awir im wekeny gar ke utkunda kesa riga wa wingirind. ² Aji win re b'asourena nena nasim wekenyit! I nangga paim win maka gar bebig kima yii b'aenam ainindam onggit gatab? Si win rakoa onggit mile omnika rigand yewaikitonda waina sosi wingir ke. ³ Mop nokip nangga ma ji rada kon ji ke ma ita de win kima nibnyin, kon ita de win kima

nibnyin wingawinga ke. Si kon re kea b'isagika yomnikond onggit rigam pilind ija na wip it re da kon ita de waina sosi b'eoma wingirind nibnyin tin b'isagika omnika. ⁴ Si ra win mera Yonggyamim nyi kima sosi b'eoma okasya, kon ita de win kima nitibnyin wingawinga ke, i kwa mera Yonggyam Yesumna danda daka ita ibim win kima. ⁵ Si win b'ogla onggit rigand sosi ke yewaikita de Satanam pilwa. Nokim da idenat tina gim ke gowukoi rigat negir okas, aji tina wingawingat yirkokar okas dem Yonggyamimna bibirind. ⁶ I waina b'asourena mile re ma b'ogil e. Ma si win wumir im da sobijog yistit ita kupka dampa inika yiyeny? Si rada odede negir mile ita yibim sosi wingirind, ton wanakana e warabag auka ikeny. ⁷ Si win b'ogla kesam yist pila kesam negir mile awir amnikinam waina sosim pilke! Nokim da idenat win sisil dampa pila kilkip kesa taukin-dam odede it re win negir kesa wekenot yist kesa dampa re dide. Mop nokip meraina Uj Igwanti Nony Iyena Diyamdiyam Mamoi B'iga Keriso re kea ongandi e yibim men kilkip kesa omnam. ⁸ Si men goro itemb diyamdiyam yamniku kesam yist kima o negirjog mile dide negir kilkiljog milemna

yist kima. Aji men b'ogla yamniku yist kesa kilkip kesa mile dide iminjog mile ke.

⁹ I kon ke wa peba erikawond da win goro b'itinkeninam negir b'iyena mile riga kima sosi wingirind. ¹⁰ Si kon ma odede mana yirikond da win goro komkesa gowukoi negir mile riga kima b'itinkeninam, opi re negir b'iyena mile riga, i butum mile riga, i yurowamam riga, i dide b'anyginena god aidol ewangaya riga. Si rada win ma opima odede gowukoi negir mile riga kima b'inkenindam, si ija emb ji pop da win b'ogla tewaikisindam onggit gowukoi ke. ¹¹ Aji yir de, kon odede mana emb ji wa erikawond da yet ra tilenggyam nyi b'atgenai gar ke utkunda rigam i ra ton odede negir mile tamnikiny opi re negir b'iyena mile, o butum mile, o b'anyginena god aidol ewangaya mile, o kar mile, o ikpip wimena mile, o yurowam mile, si goro win ton kima b'itinkeninam. I daka goro kwa ngai odede riga kima diyam taeninam. ¹² Si rika kor ma ji wiko riga b'isagikam yepim re sosi bau ke wekeny? Nayi, ma kor ma emb ji. Si rika wa ma ji wiko riga isagikam yepim re sosi wingirind wekeny? Owi, wa ma emb ji wiko. ¹³ Si Godsimemb ji riga tesagikiny yepim re sosi bau ke wekeny. Aji win b'ogla itemb negirjog mile riga yewaikita waina sosi ke.

6

Kot Omnika gatab Ongonykena Yit

¹ I ra wa wingirind yipa riga mor bebig mitibnau yipa b'enga riga kima, nangga pae man onggityam bebig isagikam yiyit gowukoi b'isagika riga wa

pilwa yepim re Godim wumir kesa wekeny? I
 nangga pae man maka yiyit yina riga wa pilwa?
 2 Si ma win namb wumir im da yina rigapim Yong-
 gyam kima yipand gowukoi riga isagika teyenanj
 dem kikitum b'isagika winind? I rada gowukoi
 rigap b'isagika okasi wa pilke, si ma win ririrjog
 riga im aindam odede sobijogjog bebig isagikam?
 3 I win kea wumir aindam da gar ke utkunda rigap
 menpim aneru tesagikindam dem. Si nangga
 pae win maka odede gowukoi sobijog gasa gatab
 bebig b'obogil tesagikindam bebig awir omnam?
 4 Si onggit paemb, rada wa opima gowukoi gasa
 gatab bebig pita aenanj sosi wingirind, ririr im
 win odede riga tabagikindam b'isagikam yepim
 re maka sosind wekeny? 5 Si kon onggityam yit
 nindenyin re wen ingar omnika mim. Si rika
 wanim iminjog bebig e odede yipa b'ogil multekip
 kima riga okatam wa wingirind, yete re ririrkip
 riga yibim gar ke utkunda riga wa wingirind
 auki bebig isagikam? 6 Aji wa ija emb ji mile
 ebnau da yipa gar ke utkunda rigat ita tina gar
 ke utkunda nany o yingganind gowukoi kot wa
 oramitam yii. Si rika win b'ogil im onggityam
 bebig teyenindam gar ke utkunda kesa riga wa
 pilwa? 7 Si wa wingirind kea pitakipind negir
 pita aeny, mop nokip win opima walenggyam
 walenggyam gowukoi kot wa b'aramitenindam.
 Si ringma, rada wa wingirind yipa rigat mor bebig
 motramitenau negir kima kaokao mile ke, si ma
 itemb re b'ogiljog e mornim da man itemb negir
 kima kaokao mile ke bebig okatenyit? I kwa rada
 wa wingirind yipa rigat mor bebig motramitenau
 rabem b'amnena mile ke, si ma itemb re b'ogiljog

e mornim da man itemb rabem b'amnena mile ke bebig okatenyit? ⁸ Aji win opima walenggyam riga wa pilind rabem b'amnena mile dide negir kima kaokao mile amnikenindam sosi wingirind. Si ton re waina gar ke utkunda nany dide yingganwarjog im Kerisomna kus ke. ⁹ Ma si win wumir im da negir kima kaokao mile rigap ma opima owabinsi dem God ma pumb tungg? Nayi, makwa opima. I win goro b'anyginena ouyaena wa b'itgarinam. Si odede riga opi re negir b'iyena riga o b'anyginena god idol ewangaya riga o gigir dide yigyig b'iyena mile riga o iyenapu riga o riga ake riga b'iyena mile riga, ¹⁰ o yurowamam riga o butumam riga o ikpip riga o kar riga o raskol riga, ton ma opima God ma pumb tungg owabinsi dem. ¹¹ Si wa sosi wingirind ninda riga win re odede riga naemb ji wekenot. Aji God wen Yonggyam Yesu Kerisomna nyiwim pilkena dide mera Godimna Yinayina Wingawingam pilkena waina negir mile esekinonj, i yina amninonj, i dide negir kesa dimdimjog riga nyi akainonj.

Waina Ji Engaeninam Godim B'ogil Inyomarena Okawam

¹² I komkesa gasa re kornim ririr im omnikam, aji ma komkesa gasapim riga b'ogil tamnikenenanj. Si onggit paemb nangga ma ji rada komkesa gasa re ririr im kornim omnikam, aji kon ma ita nangga negir milemna wiko riga nitibnyin tina danda wirand. ¹³ I kwa wa wingirind ninda rigap gowukoi gim ke gasa ukoi omnena kima endenenanj da, "Owou wekeny re komind oramita mim, i daka kom yibim re owou okata ma." Aji God osiya nimognimog

negir taminy dem. I God rigamna ji yomnikonj re ma negir b'iyena milend ingaena mana, aji Yonggyamimna wikond ingaena mana. Si Yonggyamte onggityam ji yir ipka yiyeny. ¹⁴ Si God kea Yonggyamind yutnyitonj uj ke, i Tonsimemb kwa men Tina danda ke nutnikiny dem kupka ji kima. ¹⁵ Si win kea wumir im da waina ji re Kerisomna jiwim kipear im wekeny. Si rika ririr e kon itemb Kerisomna kipear yipand inkitam yiyin yiyagiyag iyenapu konggamna kipear omniam? Nayi, makwa ririr e. ¹⁶ I ma win wumir im da yet ra b'iyena mile omniam iyenapu kongga kima, ton re kea yipaina ji i aya onggit yiyagiyag iyenapu kongga kima? Mop nokip ija emb ji yina pebat yindenya da, "Ra riga ake kongga b'itinkisya, ton osiemb nimog riga re kea yipaina ji i aya." ¹⁷ Aji yet ra b'itinkis Yonggyam kima, ton re kea wingawinga ke yipaina i aya Yonggyam kima. ¹⁸ Si win ewaikurinam onggit negir b'iyena milem pilke. I komkesa negir mile wekeny re rigaina ji bau kaim rinsim re rigap amnikanj. Aji yet ra negir b'iyena mile omniam, ton negir mile yomnik re tinajog jiwim pilwa e. ¹⁹ Ma si win ma wumir im da win kea yokatonda Yinayina Wingawingand yete re wa pilind wimena yikeny, si waina ji re Tina yinamet e yibim? Si waina ji yibim re ma wanim ingaena ma aji God ma. ²⁰ Si win waina ji ke Godind b'ogil inyomarena yokaina, mop nokip God wen akasinonj re ukoi mira kena.

7

Molkongga gatab B'ugowa Yit

¹ Si kon wen mira tamninyin ra waina b'arkena gatab e rina re win nirikautondam. Si itemb re b'ogiljog e ra rigat maka konggand pil tesopai. ² Aji riga re negir b'iyena mile singi nasim wekeny. Si onggit paemb yipayipa riga wa b'ogla towainajog kongga rebnain dide kwa yipayipa kongga wa b'ogla towainajog leo rebnain. ³ I leot b'ogla ita winind ti konggamna singi ririrkip wannikaenenin nokip ton re ti leo e. I konggat daka b'ogla odede yipa wip nya ke ti leomna singi ririrkip yannikaenenin nokip ton re ti kongga o. ⁴ Si konggat ma ririr o tinajog jiwim yonggyam tainy aji ti leote. I odede yipa wip ke leot daka ma ririr e tinajog jiwim yonggyam tainy aji ti konggato. ⁵ Si win goro waina ji b'isaya tuwenim molkongga wingirind. Aji win ina onggityam mile nena omnikenenya it re da win molkongga b'ogla naska yipand tirir omnya b'isaya gangga okatam, nokim da idenat win b'atkaenya yir opmitenam. Aji onggit kak ke win b'ogla b'usaya yipa wa taukenenya, nokim da idenat Satana maka waina b'agoka kesa b'iyena singi tengaeniny wen negir nya ke otonkenam. ⁶ Aji kon onggit gatab apureninyin re ma b'ingawa yit na aji b'ugowa yit na. ⁷ I kon singi en da rako ija na komkesa riga b'imdi kesa wekeny odede kon re dide. Aji yipayipa rigap b'engabenga yiyag wurar im akatenanaj Godim pilke. Si ninda rigap yiyag wurar akatenanaj re b'imda wimena mim, i kwa daka ninda rigap re b'imda kesa wimena mim.

⁸ Si kon onggityam yit nitindeninyin ra b'imdi kesa riga dide mik kongga wa pilwa e. I itemb re b'ogiljog e towanim ra ton b'imdi kesa tenta

wimena tuweny odede kon re dide. ⁹ Aji ra ton maka ririr taukanj towalenggyam b'agokam b'iyena singi milem pilke, ton b'ogla kongga kima, o leo kima raukinem. Mop nokip itemb re b'ogiljog e towanim b'imdam, aji ma b'ogil e towanim onggityam b'iyena mile yirngii tekeneny. ¹⁰ I kon onggityam b'ingawa yit nitinjin ra towanim ma yepim re b'imdi wekeny. I ma konten tengainyin aji Yonggyamte. Si konggat goro kwa rewaikit ti leom pilke. ¹¹ Aji rada ke konggat ti leom pilke ewaikis, ton b'ogla b'enga leo okati kesa wimena weken, o ton b'ogla b'usaya ti leom pilwa ritend yipand awowim. I kwa leot daka goro kwa ti konggand bondik wamin. ¹² I kwa kon onggityam yit nitindenyin ra towanim ma yepim re wa wingirind ninda komb riga wekeny. Aji Yonggyam maike onggityam yit yopulitonj. Si ra ya mana yipa gar ke utkunda rigam kongga ibnau yeto re maka Yesund gar ke utkunda ke yokas, i ra ket itomb konggat ti leond singi iyeny yipand wimenam, ti leot goro kwa onggit konggand bondik wamin. ¹³ I kwa ra ya mana yipa gar ke utkunda konggam leo tibnau yete re maka Yesund gar ke utkunda ke yokas, i ra ket itemb leot ti konggand singi tiyeny yipand wimenam, ti konggat goro kwa onggit leond bondik yamin. ¹⁴ Mop nokip gar ke utkunda konggamna b'ogil molkongga wimena milete gar ke utkunda kesa ti leond daka Godim wipind yina rigam ominy. I kwa gar ke utkunda leomna b'ogil molkongga wimena milete gar ke utkunda kesa ti konggand daka Godim wipind yina konggam tominy. Aji ra maka ra win odede omnikya, waina b'igawar

ra kilkil im tekeny Godim wipind. Aji yu ton re kea yina auki im wekeny Godim wipind. ¹⁵ Aji ra onggit gar ke utkunda kesa leot o konggat singi tainy ewaikitam, si ton b'ogla rewakit. Si win gar ke utkunda riga o kongga ma opima odede mile bebig ke takatenindam. Aji wa omanda nonyind owamya da God wen molkonggam ara emokinonj re ngimbla kima wimena mana. ¹⁶ Mop nokip win gar ke utkunda kongga, ma win wumir im da ra win b'obogil gar ke utkunda wimenand tuwenyit, si waina leowarip opima amaya yirkokar okasi? I kwa win gar ke utkunda riga, ma win wumir im da ra win b'obogil gar ke utkunda wimenand tuwenyit, si waina konggawarip opima amaya yirkokar okasi?

¹⁷ I Yonggyam wen yipayipa ririr nat yingg amnikinonj dide God kwa wen yipayipa ririr nat ara emokinonj b'engabenga nya ke wimenam. Si win b'ogla ija na onggit ririrind wimena tuwenyit. I intemb ji kon komkesa sosi nata b'ingawa yoramitenyin. ¹⁸ Si yet re God ma obagendi tirir omni mal wugim ipka mile yokatonj re God tin ara yemokonj, ton goro kwa wugim yerginat onggityam mal eommenam. I kwa yet re maka itemb God ma obagendi tirir omni mal wugim ipka mile yokatonj re God tin ara yemokonj, ton goro kwa itemb God ma obagendi tirir omni mal wugim ipka mile yakat onggit gim ke mal okatam. ¹⁹ I onggit God ma obagendi tirir omni mal wugim ipka milet re makwa ita nangga e yisipkis, i daka God ma obagendi tirir omni mal wugim ipka mile kesat re makwa ita nangga e yisipkis. Aji ukoi jog yisipkis re Godimna b'ingawa yit yimta undokam

e. ²⁰ Si win yipayipa rigap b'ogla omanda onggit milend wimena tuwenyit rikind re win wekenot re God wen ara emokinonj. ²¹ I yet re man wiko riga mibnot re God men ara memokonj, si man goro nony kubir taet onggit gatab. Aji rada mor ita nya mibnau b'itrari riga awowim, si itemb re b'ogiljog e b'itrari riga awowim. ²² Mop nokip yet re wiko riga yibnonj re God tin ara yemokonj Yonggyam kima yipand awowim, ton re Yonggyamimna riga e. Si kwa ton re b'itrari riga e. I kwa odede yipa wip nya ke yet re b'itrari riga yibnonj re God tin ara yemokonj, ton re Kerisomna wiko riga e. ²³ I God wen akasinonj re ukoi mira kena. Si win goro ket kwa riga wa wiko riga taukinam! ²⁴ Si kor nany dide yingganwar, win yipayipa riga omanda God kima yipand wimena tuwenyit onggit milend rikind re God wen ara emokinonj.

²⁵ I kon maka Yonggyamim pilke pil esopai kesa ngimngai gatab b'ingawa yit yokasin. Aji kon re nony ijai riga en, nokip kon kea Yonggyamim pilke kear yokatenond wumir okatam. Si kon onggityam wumir e yingg yiyenyin wa pilwa. ²⁶ Si kon nony aen da itemb re b'ogiljog e wanim didea ngimngai wimenam rija im re win yu wekenyit, nokip yu re bebig kima b'idgotnena win e. ²⁷ I rada man kongga kima e mibnyit, goro man nya oraka teyeninyit mor konggam pilke b'itrari wimenam. I kwa rada man kongga kesa b'itrari e mibnyit, man goro nya oraka teyeninyit kongga okatam. ²⁸ Aji yet ra man kongga o leo okasit, itemb re ma negir mile e mornim. Aji ra man molkongga milend mitibnyit, man opima bebig takasinyit onggit molkongga wimena wingirind. Si kon ma

singi en win onggityam bebig takatennenindam. Si onggit paemb kon wen yimak yit amneninyin. ²⁹ Gar ke utkunda nany dide yingganwar! Kon kwa onggityam yit nitindenyin ra wanim ma. Si gowukoi win re kea tuko e awik. Si yu ke yepim re kongga kima wekeny, ton b'ogla b'obogil win rakateninem Godimna wiko omniam odede it re kongga kesa riga pila re dide. ³⁰ I yepim re yii b'irinenand wekeny, ton b'ogla ija na wimena wowen odede wip da ton ma opima yii b'irinenanj. I kwa yepim re samind wekeny, ton b'ogla ija na wimena wowen odede wip da ton ma sam im. I kwa yepim re gasa imdand wekeny, ton b'ogla ija na wimena wowen odede wip da towa awir im gasa ebnainy. ³¹ I yepim re onggityam gowukoi gasa ingaena eyenanj, ton b'ogla ija na wimena wowen odede wip da onggityam gowukoi gasa re ma ukoi im towanim. Mop nokip onggit gowukoi wimena yirkokar mile re kea b'edamkena e yik. ³² Si kon singi en da win onggit gowukoi nony bebigim pilke b'itrari riga na tekenyit. I kongga kesa riga nony bebig aukeneny re Yonggyamimna wiko gatab nate odedemb da, "Kon ridede nya kae Yonggyamind samim omninyin?" ³³ Aji kongga kima rigat nony bebig aukeneny re gowukoi wiko gatab nate odedemb da, "Kon ridede nya kae kor konggand samim tomnenenyin?" ³⁴ Si ton re nony nimognimog e aukeneny. I kwa leo kesa kongga dide pil esopai kesa ngimngayit nony bebig aukeneny re Yonggyamimna wiko gatab nato. Si ton kupkakupka ji ke dide wingawinga ke Yonggyamim pilwa b'akaeneny yina omne-nam. Aji leo kima konggat nony bebig aukeneny

re gowukoi gasa gatab nato odedemb da, “Kon ridede nya kae kor leond samim omneneinyin?”

³⁵ I kon onggityam yit apureninyin re wanim b'ogil mim, aji ma gar bebig wa oramita mim wen il angkinyin. Aji kon inte singi aenyin da win wimena tuwenyit b'ogiljog dindim milend, dide kwa win kupkakupka b'akaena tuwenyit Yonggyamim pilwa, aji goro b'akaena tuwenim ninda mile wa pilwa.

³⁶ Aji yet ra nony menamena omnik da ton ma b'ogil nya kae b'ingaeny tina konggam ogeni ngimngayim pilwa, nokip ton kea onggit ngimngayind yir wong da tina kemag re kea igoukena yii leo kima awowim. I ton rigat b'ogla yamnik ririrkip omnam tina tirir omni molkongga gatab. Si ton b'ogla tina singi ririrind onggit ngimngayind wakat ti konggam. I itemb re ma negir mile e tinim. Si ton b'ogla b'akata!

³⁷ Aji yet ra tina garind danda kima imjas da, “Kon ma ita kongga tokasin,” dide rada ti awir e nanggamog omnikam yibnau. Si ton ririr e tinajog singi ririrind omnikam. I rada ton kea tirir yomnonj tinajog garind da, “Kon koinajog ogeni ngimngai okati kesa towamen,” si ton b'ogiljog mile e yomnik. ³⁸ Si onggit paemb ra yipa rigat tinajog ogeni ngimngayind ti konggam tokas, si ton ma negir mile e yomnik. Aji ra ton kwa maka tin tokas, si ton iminjog b'ogil mile e yomnik.

³⁹ I kongga re ti leomna b'ingawa wira nato wibim it re onggit winind ti leo yilo wimena yikeny. Aji ra ti leo uj tainy, ton re b'itrari kongga o tibim yipa b'enga leo okatam. Si ton b'ogla tina singi ririrind yipa b'enga leo yakat, aji ina riga yete

re gar ke utkunda riga yibim. ⁴⁰ I kon koina nonyik b'amdena ke nitindenyin. Si ra ton b'enga leo okas, itemb re ma negir mile e tinim. Aji ra ton didea leo kesa tibim, itemb re b'ogil omnijog mile e tinim. I kon nony aen da Godimna Wingawingate ken ningaeny onggit yit opurenam.

8

Aidolim pilwa Si Omni B'angga gatab Yit

¹ I kon nitindenyin b'anyginena god aidolim pilwa si omni b'angga gatab e. Si men wumir im da men komkesa opima wumir awamindam onggit b'anyginena god aidolim si omni b'angga gatab. I onggit wumirtemb wen b'asourenam amneniny, aji singi b'iyena milete wa wingirind dandam awinkenening. ² I rada yipa rigat nony menamena omnik da, "Kon uko i wumir en," si iminjog e tinim da ton makaya wumir awik onggit gatab rinte ra ton b'ogla wumir tawik. ³ Aji yet ra Godind singi iyeny, ton intemb ji riga yanim ma re God wumir ainy dide yir ipka yiyeny. ⁴ Si onggit paemb men wumir im wekeny in b'anyginena god aidolim pilwa si omni b'angga ongong gatab. Si b'anyginena god idol re makwa nanggamog e yisipkis onggit gowukoyind. I makwa ita yipa god, aji inta iminjog yipaina nena God yibim. ⁵ Si iminjog e da opima b'engabenga god wekeny wub kumbind dide gowind rinsim re rigap godim age-naenenanj. Si onggit paemb ton re ma yipa kima god im dide ma yipa kima yonggyam im wekeny. ⁶ Aji meranim re inta yipaina nena iminjog God yibim. Si Ton re mera B'u e ya pilkena re komkesa

gasa b'atobarkito i yamim re men yilo wekenyin. I kwa yipaina nena e iminjog Yonggyam yibim. Si Ton re Yesu Kerisote ya pilkena re komkesa gasa b'atobarkito i meda kwa re ti pilkena yirkokar yokatonda.

⁷ Aji ma komkesa rigapim onggit gatab b'obogil wumir wekeny waina sosi wingirind. Si ngirpu yu wa wingirind ninda riga wa re opima wumir ebainy b'anyinena god idol ewangaya mile gatab. Si ra kwa ninda rigap opimemb riga yir ongong teyenanj b'anyinena god idolim pilwa si omni b'angga ongongind, ton ija im nony taukanj da, "Ton iminjog b'anyinena god idol e yewangai." Si ra todaka towalenggyam onggityam b'angga tangranj, towaina kukip ke nonykok ra gorogoro im taukanj dide ita ipindena okatenyi odedemb da, "Men kea negir mile e yomniku Godim wipind." ⁸ Si owowit ma ita men ongapa nitiyeneniny God kima yipand b'inkindena mile omniam. Si nangga ma ji rada men maka owou tawindam, men makwa ita nanggamog e edamkisu Godim wipind. I kwa nangga ma ji rada men owou tawindam, men makwa ita nangga b'ogil e okasu Godim wipind. ⁹ Si wa ita danda komkesa b'angga dide owou owowim. Aji win yir kima tekenyit da ke onggityam waina dandat riga b'uwombenam ramnenin yepim re gar ke utkunda ke danda kesa wekeny. ¹⁰ I ita ji wa pilind wumir yibim odedemb da men ririr im si omni owou owowim b'anyinena god idol si omnikapu metind. Aji rada yipa gar ke utkunda ke danda kesa rigat wen owowind yir tanginy onggit metind, si waina milet ita tina kukip ke

nonykok gorogoro ominy dide kwa ti danda okau negir mile omniam. Si nangga ma ji rada ton nony menamena yomnikeny da b'anyginena god aidolim pilwa si omni owou owowim re iminjog negir mile e Godim wipind, aji ton ita onggityam owou tawiny win re dide. ¹¹ Si onggit paemb onggityam moina wumirte onggit gar ke utkunda ke danda kesa rigand negir yominy. Si ton re moina gar ke utkunda nany e o yinggan e ya map re Keriso uj awonj. ¹² Si win odede nya kae waina gar ke utkunda nany dide yingganwar wa pilwa negir mile amnikenenindam dide towaina kukip ke nonykok gorogoro amnikenenindam negir mile omniam. Si win onggityam negir mile amnikenenindam re Kerisom pilwa im. ¹³ Si onggit paemb rada kon koina gar ke utkunda nanyind o yingganind negir mile wa sap otendenam omnyin koina owou mile ke, kon dadal b'angga ongong tuwaben. Nokim da idenat kon maka kor gar ke utkunda nanyind o yingganind sap otendenam omnyin negir mile wa.

9

Polimna Itmikitijog Riga Danda gatab Yit

¹ Si ma kon iminjog b'itrari riga en b'angga on-gongim? I ma kon iminjog yipa itmikitijog riga en? I ma kon ke iminjog yir yongond mera Yonggyam Yesund? I dide ma winpim iminjog koina b'asowa wikom pilke kip riga Yonggyamim pilind? ² Si nangga ma ji rada kon ma itmikitijog riga en ninda riga wanim, aji kon re iminjog itmikitijog riga en wanim, mop nokip win kea Yonggyamind gar ke

utkunda ke yokatonda koina itmikitijog riga wiko map. Si win re iminjog yir ungata riga im kornim da kon re itmikitijog riga en.

³ I ninda rigap ita koina itmikitijog riga nyi gatab ji malik omnika niyenyeni. Si kon b'irmeka yit nitindenyin ra kornim ma. ⁴ I sin sosi wiko omnika ziyenya. Si ma sin ririr i sosim pilke gasa takateninya sowa owowim dide onayam? ⁵ I kwa sidaka ririr i sowa gar ke utkunda kongga kima yipand menon okatenya, opi re ton re dide ninda itmikitijog riga i Yonggyamimna yingganwar i dide Kepa yete re Petro? ⁶ Si kon dide Banaba, nangga pae sin nenap b'ogla wulkip wiko omnika iyenya sowalenggyam yir b'ipkam? ⁷ I ita yete geja riga tinajog wulkip ke tilenggyam yir b'ipka yikeny? I yet ra owoukip wul nangg tesiny ingkind, si ma ita ton onggit sopapu ke kip owou teyeniny? I kwa yet ra mamoi yir ipka teyeniny, si ma ita ton onggit mamoi wa pilke ngom mebo tanaikiny? ⁸ Si kon rigaina nony menamena kae nindenyin. Aji ringma, ma todaka Mosemna gog yitit odede yipa wip yitkak e yindeny? Owi. ⁹ Mop nokip Mosemna gog yit peband ija emb ji iriki yibim da, "Goro tugim utwangkapu gasa oramitim kau tugimind ra ton owoukip erngoka wiko iyeny!" Si onggityam yitkak yisipkis re ma nok ma da God nony kubir aeny re kaum gatab e, aji wiko rigam gatab e. ¹⁰ Si ma onggit yitkakit kupkakupka yindeny meranim ma? Owi, ton onggityam yitkak yirikonj re meranim mana. Mop nokip gou oska wiko rigat warim b'ogil isma nony kima e gou oska ziyeny, i kwa erngoka wiko rigat daka b'ogil isma nony kima e owoukip terngok wari erngoki

owou yingg okatam. ¹¹ I sida kwa odede yipa wip wiko riga im. I sin kea wa pilwa wingawinga ke tuny igmarka eyentondam. Si ra sin gim ke gasa temjindam wa pilke, si ringma, rika sin nonygor riga im? ¹² Si ninda sosi wiko rigap kea towaina danda engaenanj dide mira akatenanj wa pilke. I ra ton odede mile tamnikanj, si ringma, rika sowa ma ririr im ukoi danda tengaindam wa pilke mira okatenam?

Aji sin ma opima onggityam danda engaenindam, aji sin mimkam wimena mile kaim sowalenggyam yir b'ipka wuwenyin. Nokim da idenat sin maka nanggamog bebig oramisu Kerisomna b'ogil yirkokar bage yitim pilind. ¹³ I kwa yinamet wiko rigap opima onggityam owou awenenanj rinsim re rigap eyenenanj Godim pilwa. Si kwa yepim re wiko yomnikenenyi yina si omnikapu kapind, ton opima onggityam owou awenenanj rinsim re rigap si omnikam aramkenenanj yina si omnikapu kap wa. Si win re kea b'obogil im wumir aukindam onggit mile gatab. ¹⁴ I Yonggyam daka kea odede yipa wip ke engaeninonj da yepim re God ma b'ogil yirkokar bage yit pitapita yomnenenyi, ton b'ogla onggityam owou ke yilo wimena yakatene rinsim re rigap aramkenenanj God ma b'ogil yirkokar bage yit map. ¹⁵ Aji kon b'asourena kima nindeneyin da kon makwa yipa onggityam danda yingawond. I kon ma nok pae odede yiriken, nokim da idenat win kor notinkaindam onggityam koina danda ririrind. I ra kon onggityam singind iriken, win ma ita b'usaya ken yimta ke wip yir notngya dem. Si kon iminjog ma singi en wa pilke

mira okatam, nokim da idenat maka yipa rigat koina b'asourena kip kesa notinau. ¹⁶ Mop nokip nangga ma ji rada kon God ma b'ogil yirkokar bage yit e pitapita yomnenenyin, kor awir e nanggamog b'asourena e nibnau, nokip itemb re God ma b'ingawa wiko e kornim omniam. Onggit paemb ra kon maka God ma b'ogil yirkokar bage yit pitapita omnenenyin, kor ita sake nibnau. ¹⁷ Si ra kon gar ke singind onggitiam wiko omnikenenyin, kor ita Godim pilke mira nibnau. Aji nangga ma ji rada kon gar singi kesa nate omnikenenyin, kon b'ogla yamnikenenin, nokip God kena nony nijawonj Tina wiko rigam onggit wiko omniam. ¹⁸ Si onggit paemb nangga mira e kon okasin dem Godim pilke? Si intemb ji koina mira Godim pilke okatam, it re da kon God ma b'ogil yirkokar bage yit mira kesa e pitapita yomnenenyin, nokim da idenat kon maka komkesa opimemb koina danda tengaeneninyin mira wulkip okatam.

¹⁹ I kon komkesa riga wa pilke b'itrari e nibnyin. Aji kon kolenggyam komkesa rigaina wiko riga na awond, nokim da idenat kon jogjog riga teyeninyin Kerisom pilwa. ²⁰ Si ite re kon Ju riga wa pilwa nekenenyin, kon Ju riga waina mile im amnikeneninyin Ju riga pila, nokim da idenat kon opimemb Ju riga teyeninyin Kerisom pilwa. I kwa iminjog e da kon re ma gog owama riga en, aji ite re kon gog owama riga wa pilwa nekenenyin, kon ija e wip aukenenyin da kon re gog owama riga en, nokim da idenat kon opimemb gog owama riga teyeninyin Kerisom pilwa. ²¹ I kwa iminjog e da kon re ma God ma gog kesa riga en aji kon re Kerisomna gog owama riga en. Aji ite

re kon gog kesa riga wa pilwa nekenenyin, kon gog kesa riga pila e aukenenyin, nokim da idenat kon opimemb gog kesa riga teyeninyin Kerisom pilwa. ²² I ite re kon gar ke utkunda ke danda kesa riga kima nibnenenyin, kon towaina danda kesa mile ririr nate aukenenyin, nokim da idenat kon onggityam gar ke utkunda ke danda kesa riga teyeninyin Kerisom pilwa gar ke utkunda danda okawam. I dide kwa kon komkesa b'engabenga rigaina mile wa aukenenyin, nokim da idenat kon towa wingirind leamog riga yirkokar wa teyeninyin koina kupka danda ririrind. ²³ Si kon God ma b'ogil yirkokar bage yit map komkesa mile amnikeneninyin. Nokim da idenat kon God ma onggityam b'ogil yirkokar bage yit warabag omnikand b'ogil yingg okatenyin.

²⁴ I nangga ma ji rada komkesa b'ikena riga b'itkenanj wibapu aband, aji yipaina nenat komkesa riga terariny i tontemb ket mira okas. I win re kea onggit mile gatab b'obogil wumir aindam. Si widaka ija na yipa wip b'itkenindam, nokim da idenat win b'ogil mira okasya Godim pilke. ²⁵ I komkesa wiba riga yepiya ra b'atonkena tuweny naskajog pipmet okatam, ton ma sobijog b'asowa kima im b'auyaena tuweny towalenggyam yirgong auka kima. I onggit wiba rigap odede mile omnika eyenanj re nok mim da idenat ton mira dira temdanj rinsim ra titkikanj. Aji men gar ke utkunda rigap odede mile omnika eyenindam re nok mim da idenat men mira dira temjindam rinsim ra maka titkikanj. ²⁶ Si onggit paemb kon dimdim e b'ikenenyin undwatapu mal wa odede ringmim re wiba riga dimdim

b'ikenenanj. I kon kwa yimkik b'iskenenyin re tunkipjog wa e, aji ma odede b'ipowa wiba riga pila im yepim re yimkik b'enga tab wa b'iskenanj. ²⁷ Si kon koinajog ji e ipowa yiyenyin ukoi koi kima, i odede b'agoka kaemb kon koina ji wiko rigam yommenenyin b'ogil dimdim mile omniam Godim wipind. Nokim da ke God maka kor nenjikitau dem b'ogil mira okawam, onggit kak ke ra kon ninda riga wa God ma b'ogil yirkokar bage yit pitapita omnena teyenawainyin.

10

Israel Riga waina Mile ke Nonony Yitkak

¹ Gar ke utkunda nany dide yingganwar! Kon ma singi en da win onggit gatab wumir kesa tekenyit. It re da komkesa mera b'ubar wekenenonj moyimna pip wira nat re ton ginggil kikibind wekenenonj wul kesa tunggind, dide ton kea komkesa gil nya ijendo Kuskus Sipa. ² Si ton komkesa Mosemna yimta undoka riga awowim baptiso yokato re onggit moi kena dide onggit sipa kena. ³ I ton komkesa ina yipaina nena owou yoweneno wul kesa tunggind rina re God pumb ke akainonj wingawinga nya ke. ⁴ I ton komkesa kwa ina yipaina nena nyi yonaeneno rina re God wingawinga nya ke akainonj. Si onggityam nyi yonaikeneno re onggit wingawinga ke kila kena rina re ton kima yipand yikenonj wul kesa tungg nata. Si onggit paemb itemb kila re Kerisot yebim. ⁵ Aji God maka sam aukenenonj towa wingirind momta komkesa riga kima. Si onggit penaemb ton komkesa uj auka wuwenonj

wul kesa tungg nata. ⁶ Si komkesa opimemb mile re meranim wingata im aukito. Nokim da idenat men maka singi teyenindam negirjog mile odede rija na re onggit rigap singi eyenento. ⁷ I goro win b'anyginena god idol ewangaya mile riga taukinam odede towa wingirind ninda riga re dide. Nokip yina peband towaina ewangaya mile gatab ija emb ji iriki yibim da, "Onggit rigap omnicto owowim dide onaikam, i ket owinkito omarnena kima b'engabenga mile omnikam." ⁸ I towa wingirind ninda rigap kea negir b'iyena mile amnikto, si ingkenaemb twenti tri tausin (23,000) riga uj sap otekto yipa bibir wingirind. Si onggit paemb meda goro kwa negir b'iyena mile ramnikinum odede ton re dide. ⁹ I kwa towa wingirind ninda rigap kea Kerisond negir nya ke otonkena yiyeno, si ton uj aukito re girem waina ongi kena. Si onggit paemb meda goro kwa Kerisond negir nya ke otonkena yeyenu odede ton re dide. ¹⁰ I dide kwa towa wingirind ninda rigap Godind soro kima yit yipateni, si God aneru yitmikitonj dide ket ten uj andrikinonj. Si onggit paemb win goro kwa Godind soro kima yit ipatena iyanya! ¹¹ Si opimemb komkesa towa pilind auki mile re wingata im. I kwa opimemb mile iriki wekeny yina peband re meranim nonony omnena mim yepim re men wimena wuwenyin onggit gowukoi kikitum winind. ¹² Si onggit paemb yet ra nonyik b'atimdeny da, "Kon wingawinga ke danda kima onyiti riga en," si ton b'ogla tilenggyam yir b'epik odede nony kima da, "Ke kon sap rotendin." ¹³ I negirimna otonkena rinsim re win wip awarkenindam re ina nena

im rinsim re rigap ririr im takatenanj. Aji God re nony ijai riga e wanim. Si onggit paemb Ton ma ita nangga bebigjog negirimna otonkena tenjikisiny wanim wip owarkenam rinsim re win ma ririr im wip owarkenam. Aji rada win bebigjog negirimna otonkena nasim wekenyit, Ton ita wa nya tamnikau opendam. Si ingkaemb win danda takatenindam onggityam negirimna otonkena wip owarkenam.

Areto dide Aidolim Si Omni Owou gatab Yit

¹⁴ Kor nany dide yingganwar yena re kon singi eyeninyin! Si onggit paemb win b'anyginena god aidol ewangaya milem pilke ewaikurinam! ¹⁵ I kon wanim nitindenyin ra b'ogil multekip kima riga pila e. Si win walenggyam yir eyeninam nangga im ra kon tapureninyin. ¹⁶ I men areto kapo b'ogil yomnenyu areto omnikam. Si itemb re Kerisomna kus yingg okatena e. I kwa daka men sana nganja yipkikenenyu areto omnikam. Si itemb re kwa Kerisomna ji yingg okatena e. ¹⁷ Si men jogjog riga re yipaina ji im aukindam, mop nokip sana nganja re yipaina e dide men komkesa yingg yokatenenyu re onggit yipaina nena sana nganjam pilkae. ¹⁸ Si win yirik eyeninam Israel kus riga! Si ton re opima si omniki owou awenenanj, si tonpimemb ji yina si omnikapu kap yingg okati riga God kima yipand b'inkitam. ¹⁹ Si nangga e kon nindenyin b'anyginena god aidolim si omni owou gatab dide b'anyginena god aidol gatab? Kon ma nok ma nindenyin da b'anyginena god aidolim si omni owou re ukoijog im dide b'anyginena god aidol re kwa ukoijog e. ²⁰ Aji kon

nok ma nindenyin da b'anyginena god aidolim si omna mile re negir wingawinga wa pilwa e, aji ma Godim pilwa e. Si kon ma singi en da win negir wingawingamna yingg iyena riga taukindam negir wingawinga kima yipand b'inkitam. ²¹ Si win ma ririr im Yonggyamimna areto kapo onayam yipand negir wingawinga waina kapo kima. I kwa daka win ma ririr im yingg okatam yipand Yonggyamimna areto kasam pilke dide negir wingawingamna kasam pilke. ²² Si ra men odede mile tamnikindam Israel riga re dide, Yonggyam ita gar soro kima nonyik b'iponena mile okas. Si ringma, rika men ririr im odede mile omniam Yonggyamim wipind? Ma ririr e! I kwa rika men dandajog riga im, aji Yonggyam re ma danda riga e?

Gar ke Utkunda Rigamna B'itrari Mile Ingawam Nya

²³ I komkesa gasa re ririr im kornim omniam, aji ma komkesa gasapim riga b'ogil amnikenenanj. I kwa komkesa gasa re ririr im kornim omniam, aji ma komkesa gasapim riga gar ke utkunda danda akaenanj. ²⁴ I goro kwa yipa rigat nanggamog na oraka yeyen tinim b'ogilim, aji ninda riga wa b'ogil mana. ²⁵ I ra win nanggamog b'asoga b'angga yir tangindam maketpund, win goro b'arkena tuwenim da, "Ma itemb re b'anyginena god aidolim si omni e?" Aji win b'ogla jaba imda nena teyenindam ongongim. Nokip rada win ma wumir im onggit gatab, waina kukip ke nonyokokip ra ma opima beb'ig takatenanj. ²⁶ Mop nokip yina peband ija emb ji yindenya da, "Onggityam

gowukoi dide komkesa gasa onggit gowukoyind re Yonggyamimna im.”²⁷ I rada gar ke utkunda kesa riga wingirind yipa rigat wen tengaukiny diyamim dide ra ket win singi taindam menonim, win b'ogla komkesa owou dide b'angga tawindam rinsim re wa wipind oramki wekeny. Aji win goro b'arkena tuwenim da, “Ma itemb re b'anyginena god aidolim si omni e?” Nokip rada win ma wumir im onggityam gatab, waina kukip ke nonykok ra ma opima beb'ig takatenanj.²⁸ Aji ra yipa rigat wen wumir tamniny da, “Itemb owou re b'anyginena god aidolim si omni e,” si win goro owa onggityam owou. Mop nokip ra win ouya ton ita tina kukip ke nonykokind wa gatab nony menamena tamnikiny da win kea b'anyginena godimna yingg yokatenya.²⁹ Si re kon kukip ke nonykok gatab nindeniyin re ma wainajog kukip ke nonykok im, aji yipa rigamna e. I kon re b'itrari riga en, si kon ririr en komkesa owou owowim. Aji nangga pae yipa rigamna kukip ke nonykokit koina b'itrari mile b'isagakam omneny?³⁰ I ra kon Godind siteket yit omnenyin koina owou gatab dide ra ket tawinyin onggityam owou, si nangga pae kon b'isadrena yit akateninyin riga wa pilke onggityam koina siteket yit omneni owou gatab?³¹ Si onggit paemb rada win owou tawindam o rada nyi tanaikindam o rada nanggamog wiko tamnikindam, win b'ogla komkesa tamnikindam Godind b'ogil inyomarena okaenam.³² Si win goro ombombrena kima riga taindam towa pilwa opi re Ju riga, i Grik Riga i dide Godimna sosi!³³ Si kon ma opima odede mile oraka eyeninyin kornim b'ogilim, aji jogjog riga wanim b'ogil mim. I idenat

kon komkesa riga gar sam okaena teyeninyin komkesa koina mile ke, nokim da idenat ton yirkokar okasi. Si widaka ija na odede mile tamnikenindam it re kon re dide.

11

¹ Si win b'ogla ija na koina lomena yimta undoka riga aukinam rija im re kon Kerisomna lomena yimta undoka eyeninyin.

Yir Opmita Winind Kongga waina Mop Utwangka gatab Yit

² I win ita ken nonyik niyenyanya koina komkesa omnika gatab ke, i kwa win itmikitijog riga wa pilke b'isateni sosi ma get ke mile emorka eyenindam odede ringmana re kon wa ogona eyeninond. Si onggit paemb kon wen esourena eyeninyin. ³ Aji kon singi en win wumir okasya onggit gatab. Si opi re da yipayipa rigaina mopyam re Kerisote, i konggaina mopyam re ti leote, i dide Kerisomna mopyam re Godte. ⁴ Si komkesa riga yipayipa yet ra kobirgim ke mop b'utwangki yir opmita omnik o bage yit pitapita omneny, ton kea tina mopyam Kerisond ingarim omnena yiyeny. ⁵ Aji komkesa kongga yipayipa yet ra kobirgim ke mop b'utwangki kesa yir opmita omnik o bage yit pitapita omneny, ton kea tina mopyam ti leond ingarim omnena yiyeny. Mop nokip odede kongga re yipa ririr o onggit negir ingar kongga kima yeto re komkesa mopngii b'ijgi wibim. ⁶ Si ra konggat maka ra kobirgim ke mop b'utwangik, ton b'ogla tina komkesa mopngii b'epik. Aji ra ton ingar ke b'atkas onggityam mopngii b'ipki dide mopngii b'ijgi gatabim, ton b'ogla kobirgim ke tina mop

b'etwangik. ⁷ I riga re God pila omniki e dide Tina b'ogil inyomarena kima e. Si onggit paemb rigat goro kwa kobirgim ke tina mop b'etwangik. Aji kongga re ti leomna b'ogil inyomarena kima o. ⁸ Mop nokip riga re ma konggam pilkena aukonj aji konggat rigam pilke aukonj. ⁹ I kwa God riga yotobarkonj re ma konggam yim okawa mana, aji kongga wotobarkonj re rigam yim okawa mana. ¹⁰ I kwa daka anerup gar ke utkunda riga im yir ipka eyenanj. Si onggit paemb kongga b'ogla kobirgim ke tina mop b'etwangik ouyawam da ton re ti leomna danda wira nato wibim. ¹¹ Aji riga ake kongga re Yonggyamim pilnasi yipand ebnya, si kongga ma ita tinta tibim riga kesa, i daka riga kwa ma ita tinta ibim kongga kesa. ¹² Mop nokip kongga re rigam pilkae b'atobarkonj, dide riga daka odede yipa wip ke konggam pilkena pita awonj. Aji komkesa riga ake kongga Godim pilkaim. ¹³ Si win walenggyam b'obogil yongwata! Ringma, rika b'ogil e konggat Godim pilwa yir opmitena tikeny kobirgim ke tina mop b'utwangki kesa? ¹⁴ I waina get ke nony menamena milet daka wen pita kipind ouyaena eyeniny da rada rigam mopngii pinpin im yibnainy, itemb re tinim isnawa kesa mile e. ¹⁵ Aji rada konggam mopngii pinpin im wibnainy, itemb re tinim b'ogil inyomarena e. Mop nokip God konggam mopngii pinpin wokainonj re tina mop utwangka mana. ¹⁶ I nangga ma ji rada ninda riga opima yit b'ugwatananj onggit gatab, aji ma osiya odede mopngii omnika mile ebnya sowa pilind dide kwa ma osiya Godimna sosim pilind.

Areto gatab Yit

(Mat 26:26-29; Mak 14:22-25; Luk 22:14-20)

¹⁷ I kon ma opima wen tasoureninyin onggit b'ingawa yit gatab rinte ra kon nitindeninyin. Mop nokip waina b'eoma b'engka wuweny re ma b'ogiljog omnika mile wa im, aji negirjog omnika mile wa im. ¹⁸ I intemb ji naskajog mop. Si kon ita yidir yit utkundena nekenyinyin da opima waina sosi wingirind bu b'iyena mile wekeny, opi re win b'eomenenindam yir opmitenam. Si kon opima ninda onggityam yit iminjog ke ameninyin. ¹⁹ Si wa wingirind ninda rigap b'ogla b'engabenga bu b'iyena riga bobo auka wowen dide ket yit b'ugwatena mile pita raukinem onggit riga bobo wingirind. Nokim da idenat God wen tatonkeniny da waina mile iminjog im o kaokao im i ingkaim ket iminjog imjati riga pita wa tapekiny riga wa ongwatam. ²⁰ Si onggit paemb win opima b'eomenenindam areto omnika, aji itemb waina mile re ma Yonggyamimna areto owowim omnika mile e. ²¹ Mop nokip win yipayipa rigap naska naska im waina owou akatenenindam owowim, si ninda riga re owoupa im aukenenanj, aji daka ninda riga re ikpip im aukenenanj. ²² Si win nangga pae odede nenegir nya ke areto amnikenenindam? Si ringma, rika wa awir im met owowim dide onaikam? Si nangga pae win odede Godimna sosi isnawa kesa yomnikenanya dide odede gasa kesa riga ingarim amnikenenindam? Si b'ogla nangga yit im kon wen tamninyin? Rika ririr en kon wen tasoureninyin? Nayi, kon ma opima wen tasoureninyin onggit gatab.

²³ Mop nokip kon inaemb ji areto gatab yit Yong-

gyamim pilke yokatond rina re kon wa akainond. Si onggit siwinyind re Yonggyam Yesund tib yiyo, Ton ket sana nganja yokatonj, ²⁴ dide Godind siteket yit yomnonj ngirpu ket yipkikonj. I Ton ket yindonj da, “Itemb sana nganja re Koina ji e rinte ra wanim takaen. Si win onggityam mile emb omnika iyenena Ken nony iyenam.” ²⁵ I re ton diyam seg auto, Yesu kwa yipa wip nya ke yipa kapo yokatonj dide ket yindonj da, “Itemb kapo re Koina kus ke oramiti outinti sisil tirir omnijog male. Si win onggityam mile emb omnika iyenena Ken nony iyenam ita winind ra win onggityam kapo onaikenena.” ²⁶ Mop nokip win ita winind ra itemb sana nganja owenena dide itemb kapo onaikenena, win Yonggyamimna uj gatab e pitapita omnena iyenena ngirpu ra Ton titenj dem.

²⁷ Si onggit paemb yet ra maka ririrkip mile omnika teyeniny Yonggyamim wipind, i ra ton onggityam sana nganja ou dide onggityam kapo onai, ton onggityam tina mile ke Yonggyamimna ji dide kus kil kima i amnik dide ton kea negir ma b'isagika mile yokas tina garind. ²⁸ Si rigat b'ogla tilenggyam b'obogil b'angwatena yeken, i ingkek ket ton b'ogla itemb sana nganja yau dide itemb kapo yanayik. ²⁹ Mop nokip yet ra maka onggityam Yonggyamimna ji b'obogil ongas, aji ra ton areto ou dide onai, ton onggityam owou dide onaika mile ke Godimna negir ma b'isagika okatena yiyeny re tinim ma. ³⁰ Si onggit mop penaemb wa wingirind jogjog riga kea ji ke danda kesa aukenento dide kopa aukenento i dide kwa ma yipa kima riga na uj auke-

mento. ³¹ Aji rada men meralenggyam b'obogil im yir b'iyenindam meraina mile ongwatam, si men ma opima onggityam negir ma b'isagika okatena teyenindam. ³² Aji men re kea Godim pilke onggityam negir ma b'isagika akatentondam onggit gowukoyind. Si ingkaimemb men kwa Yonggyam Godim pilke b'auyaena yokatenyu b'ogil mile omnikam. Nokim da idenat men maka negir ma b'isagika okatenyu yipand komkesa gowukoi riga kima. ³³ Si onggit paemb, kor gar ke utkunda nany dide yingganwar, ra win b'eoma tuwenyit areto owowim, win b'ogla wa wingirind yir b'ungauka tuwenyit yipand gilgil areto omnikam. ³⁴ I yet ra owoupa tainy, ton b'ogla diyam rau tina metind. Nokim da idenat waina b'eoma maka taukanj negir ma b'isagika okatam. I kwa kon ninda areto gatab b'ingawa yitkak terarinyin ra yimta ke ouyaena mim, ra kon netken dem wa pilwa.

12

Yinayina Wingawingam pilke Yiyag Wurur

¹ Gar ke utkunda nany dide yingganwar! Kon ma singi en da win wumir kesa tekenyit Yinayina Wingawingamna yiyag wurar gatab. ² I win re kea wumir aukitondam da win re gar ke utkunda kesa riga na wekenot, win menon yokatenonda re yit kesa b'anyginena god idol wa pilwa na i dide ton wen wip amnikenento re b'engabenga omnika nya wa na. ³ Si onggit paemb kon wen wumir tamninyin ra Yinayina Wingawingamna yiyag wurar gatab b'obogil ongwatam yit e. Si

onggit rigam ya pilnat ra Godimna Wingawinga b'imuri ibim yit opurenam, ton ma ririr e odede indeny da, "Yesu sake yakat!" I kwa onggit rigam ya pilnat ra Yinayina Wingawinga maka b'imuri ibim, ton ma ririr e odede indeny da, "Yesu re kor Yonggyam e."

⁴ I opima b'engabenga yiyag wurar wekeny sosi wingirind, aji yipaina Yinayina Wingawingate onggityam yiyag wurar riga wa ogona eyeniny. ⁵ I kwa daka opima b'engabenga pipmet wekeny God ma wiko omniam, aji kwa daka yipaina Yonggyamte onggityam pipmet riga wa ogona eyeniny. ⁶ I dide opima b'engabenga wiko wekeny sosi wingirind, aji yipaina Godte onggityam komkesa wiko ogona eyeniny komkesa riga wa omniam. ⁷ Aji Yinayina Wingawingat re b'engabenga danda im pitapita amneniny yipayipa riga wa pilwa, nokim da idenat yipayipa rigap Yinayina Wingawingam pilke onggityam okati yiyag wurar tengaenenanj kupka sosi b'ogil omnam. ⁸ Si onggit paemb yipaina Yinayina Wingawingat yipa rigam yokau re b'ogil multekip kima yitkak e riga b'obogil ugowam, aji kwa yipa rigam yokau re b'ogil wumir kima yitkak e riga ouyaenam. ⁹ I kwa yipaina Yinayina Wingawingat yipa rigam yokau re danda kima gar ke utkunda yiyag wurar e, aji kwa onggit yipaina Yinayina Wingawingat yipa rigam daka yokau re kopa ke riga isakendam yiyag wurar e. ¹⁰ I Ton kwa yipa rigam yokau re kid kesa kima danda wiko omniam yiyag wurar e, i kwa yipa rigam re bage yit opurenam yiyag wurar e, i kwa yipa rigam re b'engabenga wingawinga ongwatenam yiyag

wurar e, i kwa yipa rigam re b'engabenga yit opurenam yiyag wurar e, aji kwa yipa rigam re b'engabenga yit engendurkenam yiyag wurar e. ¹¹ I Yinayina Wingawinga re yipaina e, dide onggit yipaina Yinayina Wingawingate opimemb komkesa yiyag wurar yir ipka eyeniny, si Tonsim onggityam yiyag wurar yipayipa riga wa ogona eyeniny Tina singi ririrind.

Yipaina Jiwind Jogjog Kipear

¹² I ji re yipaina e, aji ton jogjog kipear kima e. I opimemb komkesa jiwimna kipear yipand b'inkuranj re ji e ainy. I odede yipa wip ke Keriso daka re yipa ji e, aji Ton re jogjog kipear kima e. ¹³ Mop nokip men komkesa, Ju riga dide Grik riga, i wiko riga dide b'itrari riga, yipaina Yinayina Wingawinga na yokatonda i ingkenaemb baptiso yokatonda yipaina ji awowim. Si men komkesa onggityam yipaina Yinayina Wingawingam pilkaim nyi onaya pila danda akatenenindam yipand awowim. ¹⁴ Mop nokip kwa ji daka re ma yipaina nena kipear kima e, aji jogjog kipear kima e. ¹⁵ Si nangga ma ji rada pisit indeny da, "Kon re ma yim en, si kon ma jiwim pilnate nibnyin," aji itemb pis re ma ita tina opureni yit map jiwim pilke ewaikiti yibim. ¹⁶ Si nangga ma ji rada yipyat indeny da, "Kon re ma yirkip en, si kon ma jiwim pilnate nibnyin," aji itemb yipya re ma ita tina opureni yit map jiwim pilke ewaikiti yibim. ¹⁷ I rada kupka ji re yirkip e, si rokate yipya ara utkundam? I kwa rada kupka ji re yipya e ara utkundenam, si rokate sokak ngirang isnginenam? ¹⁸ Aji God komkesa yipayipa

kipear jiwind oramka eyeninonj re towaina pipmet nat Tina isamki singi ririrind. ¹⁹ Si rako komkesa kipear yipaina wip kipear wekeny, si rikind rako ji yibim? ²⁰ Aji ija emb ji da kipear re jogjog im, aji ji re yipaina e. ²¹ Si yirkipit ma ririr e yimind ominy da, “Kon ma ita men singi motineny in ingaenam.” I kwa daka moptekipit ma ririr e pis taminy da, “Kon ma osiya wen singi tamneneny in ingaenam.” ²² I kwa daka men jiwind ninda kipear opima irinena eyenindam da ton re danda kesa kipear im wekeny. Aji ton jiwind wekeny re iminjog ingaenam kipear im. ²³ I kwa men ninda jiwind kipear opima nonyik irinena eyenindam da ton re ma b'ogil isnawa kima kipear im wekeny. Aji men opima onggityam kipear b'ogil isnawa kima ejga eyenindam. I men kwa opima b'obogil yir ipka eyenindam onggityam kipear rinsim re men ma singi im riga wa ouyawam. ²⁴ Aji men ma opima singi eyenindam onggityam kipear b'obogil yir ipkam rinsim re men singi riga wa ouyawam. Aji God opimemb kipear ukoi jog esnaeneniny rinsim re men yir ke awaenenindam. Si odede nya kenaemb God komkesa kipear jiwind eomkisinonj. ²⁵ Nokim da idenat jiwind kipear ip maka b'u b'iyena mile tamnikenanj, aji b'ogla komkesa kipear yipaina nonykok kima towalenggyam towalenggyam nony kubir aena wowen. ²⁶ Si rada yipa kipearit b'idgotnena okas, si komkesa kipear opima yipand gilgil onggityam b'idgotnena okatenyi. I kwa rada yipa kipearit esourena okas, si komkesa kipear opima yipand gilgil onggityam sam okatenyi.

27 Si win yipand sosi aindam re Kerisomna ji e, dide win yipayipa riga re Tina kipear im. 28 Si Godit onggit sosind b'engabenga pipmet aramkinonj riga wa ogonam, naskajog re itmikitijog riga, i nimogim re bageyam, i nowam re ouyaena riga, i onggit kak ke re kid kesa kima danda wiko omniam yiyag wurar okati riga, i onggit kak ke re kopa riga isakendam yiyag wurar okati riga, i kwa yim b'akawam yiyag wurar okati riga, i kwa wip iyenam yiyag wurar okati riga, i dide kwa b'engabenga yit opurenam yiyag wurar okati riga. 29 Si ringma, rika komkesa re itmikitijog riga im? I rika komkesa re bageyam im? I rika komkesa re ouyaena riga im? I rika komkesa re kid kesa kima danda wiko omniam yiyag wurar okati riga im? 30 I rika komkesa re kopa riga isakendam yiyag wurar okati riga im? I rika komkesa rigap apurenanj b'engabenga yit im? I rika komkesa rigapim engendurkenanj b'engabenga yit? Nayi, ma ija im. 31 Aji win b'ogla ukoi jog yiyag wurar na oraka teyenindam!

Singi B'iyena Mile

Si kon ket wa yipa ukoi jog b'ogil nya e tauyaeninyin onggityam komkesa yiyag wurar ingaenam.

13

1 I nangga ma ji rada kon opima apureninyin ninda rigaina yit dide kwa aneru waina yit, aji ra kon maka ra singi b'iyena mile kima tapureninyin, si koina opurena re utkunda kesa b'iyounena mim taukanj odede it re pletokak

ipowa re dide o dramkak ipowa re dide. ² I kwa
 nangga ma ji rada kon bage yit opurenam yiyag
 wurar yokasin, si kon komkesa wigawiga gatab
 dide komkesa wumir gatab wumir akasinyin, i
 dide nangga ma ji rada kon kupka danda kima
 gar ke utkunda kima en, si kon ririr en yipa dor
 ingaen ewaikitam tina pipmet ke, aji ra kon maka
 ra singi b'iyena mile kima onggityam yiyag wurar
 tengainyin, si opimemb koina omnika mile re kip
 kesa im taukanj. ³ I dide kwa nangga ma ji rada
 kon koina komkesa gasa tagoninyin gasa kesa
 riga wa, i dide nangga ma ji rada kon koina ji
 b'atkaen wul ke imbrikam, nokim da idenat kon
 b'atisourenyin, aji ra kon maka ra singi b'iyena
 mile kima opimemb mile tamnikinyin, si
 opimemb koina omniki mile re makwa opima
 b'ogil kip kima taukanj.

⁴ Si singi b'iyena mile kima riga re mimkam
 kae wimena yikeny, dide singi kima wurar mile
 omnika teyeniny. Aji singi b'iyena mile kima rigat
 ma opima odede mile tamnikiny opi re nonyik
 b'iponena mile, i tubor mile, i b'asourena mile, ⁵ i
 b'isnawa kesa mile, i butum mile, i soro mile, i dide
 nonyik iyena mile rigaina omniki negirjog mile
 gatab. ⁶ I ton sam kima ngolengole omnika mile
 tamnikiny ra ma negir kima kaokao mile kima
 e, aji God ma iminjog mile kima e. ⁷ I dide kwa
 ton opima komkesa bebig mile wip tawarkeniny
 mimkam wimena kima, i komkesa gasa gar ke
 utkunda kaim takateniny, i komkesa gatab ke
 warim b'ogil isma yir ungauka teyeniny, i dide
 komkesa mile tamnikiny mimkam wimena kima
 im.

8 I singi b'iyena mile ma ita b'eteomneny, aji bage yit opurena mile ita awir tainy, i b'engabenga yit opurena mile ita kwa seg tainy, i dide b'ogil wumirim yiyag wurar toda kwa ita awir tainy. 9 Mop nokip men kombkomb im wumir akatenindam dide kombkomb im bage yit opurena eyenindam. 10 Si ra kupka mile ririrkip aukam win ik dem, onggityam kombkomb mile opima awir taukanj dem. 11 I re kon b'iga sobijogind nibnond, kon yit apureninond re b'iga sobijog pila na, i wumir akateninond re b'iga sobijog pila na, i dide nonyik b'amdenenond re kwa b'iga sobijog pila na. Aji re ket kon rigajog awond, kon awir amnikinond opimemb komkesa b'iga sobijog omnika mile. 12 Si yu men ma pita kip nasim gasa yir ongong eyenindam odede ringma re rigat wip b'atapnenapu sibibibib glasind tina wipkak yir b'angeneny re dide. Aji wari men pitakip nasim gasa yir ongong teyenindam dem odede ringmim re rigap wip ke wip ke yir b'angenenanj re dide. I yu kon kombkomb im wumir akateninyin, aji ra win ik dem, kon kupkakupka wumir takasinyin dem odede ringma re God kornim kupkakupka wumir auki yibim re dide. 13 Si insimemb ji nowa mile wekeny meranim opi re gar ke utkunda mile, i warim b'ogil isma yir ungawa mile, i dide singi b'iyena mile. Aji onggityam nowa mile wingirind ukoijog mile ainy re singi b'iyena mile e.

14

*B'engabenga Yit Opurenam Yiyag Wurar dide
Bage Yit Opurenam Yiyag Wurar*

¹ Si win b'ogla onggityam singi b'iyena milend wuwene! Aji win b'ogla ukoi singi kima Yinayina Wingawingamna yiyag wurar oraka teyenindam, aji ukoi jog singi iyenam re bage yit opurenam e. ² Mop nokip yete re b'engabenga yit yopureny, ton opurena yiyeny re ma riga wa pilwa e, aji Godim pilwa e. Mop nokip makwa yipa rigat ita nony tawik, aji ton wigawiga yit im apureniny wingawingam pilke. ³ Aji yete re bage yit yopureny, ton opurena yiyeny riga wa pilwa towanim danda okawa ma, i towanim ugowa ma, i dide towanim irmeka ma. ⁴ Si yete re b'engabenga yit yopureny, ton tinim nena e danda b'akaeny. Aji yete re bage yit yopureny, ton kupka sosi ma danda yokaeny. ⁵ Aji kon singi en da komkesa win b'engabenga yit na tapurenindam, aji koina ukoi jog singi inte da win bage yit na tapurenindam. Aji yet ra b'engabenga yit tapureniny, dide ra yipa rigat maka ra tina opureni yitkak tengendurkeniny kupka sosind danda okawam, ton re ma ukoi yit e yopureny. Aji yet ra bage yit tapureniny, ton re ukoi jog yit e yopureny.

⁶ Si gar ke utkunda nany dide yingganwar! Yir de, ra kon netken wa pilwa b'engabenga yit opurenam, aji ra kon maka ra wen yit tamneninyin liyalliyal ouyawa ke, o wumir yitkak ke, o bage yitkak ke, o ouyaena yitkak ke, si nangga b'ogil e win okasya kor pilke? ⁷ I kon odede yipa wip wingata yit e nitindenyin yirkokar kesa ipaya gasa gatab. Si ra wugewuge o gita maka ra arara taeny tinajog ipaya ger nonykok ririrind, si ridedena kae rigap ongwasi da, "Itemb re onggityam nonykok wugewuge ipaya ara e," o da "Itemb re

onggityam nonykok gita ipaya ara e?" ⁸ I kwa ra mowir maka ra b'obogil pitand arara taeny, si yete b'atngonjeny geja omniam? ⁹ Si wa pilind daka yipa wip e. Si ra win maka ra nony auka kima yit tapurenindam b'engabenga yit ke, si ridede nya kae rigap wumir okasi nangga im win apurenindam? Si opimemb waina opurena re jaba epaurena im wuweny pumb nata. ¹⁰ I iminjog e da ma yipa kima yit im wekeny onggit gowukoyind, aji komkesa yit opurenam re isipmarena kima im. ¹¹ Si ra kon maka yipa rigamna opureni yitkak takasinyin, kon ra wumir kesa riga e taen tinim yete re onggityam yit yopureny. I kwa daka ra yipa rigat maka koina opureni yitkak takasiny, ton kornim wumir kesa riga e tainy. ¹² Si wa pilind daka yipa wip e. Si win re Yinayina Wingawingamna yiyag wurar ukoi kana singi omnena riga im, si win b'ogla onggityam yiyag wurar oraka teyenindam kupka sosind danda okaenam, nokim da idenat win sosi ukoi warabag omnika iyenya. ¹³ Si onggit paemb yet ra b'engabenga yit tapureniny, ton b'ogla yir ropmit da ton tengendurkeniny tina opureni yitkak. ¹⁴ Mop nokip ra kon yir topmisin b'engabenga yit opurena ke, koina wingawingate yir topmis, aji koina gar re b'enga nony e ibim. ¹⁵ Si kon nangga e omniam? Si kon b'ogla yir topmitenyin koina wingawinga ke, aji kon b'ogla kwa koina gar ke daka yir topmitenyin. I kon b'ogla Godim ewangaya ger tatanginyin koina wingawinga ke, aji kon b'ogla kwa koina gar ke daka onggityam ger tatanginyin. ¹⁶ Si ra man Godind esoulisit moina wingawinga nena ke sosi b'eomapund, aji maka ra man nony

auka kima yit ke tapulisinyit, si moina opureni yit wumir okati kesa riga yete re yibim onggit b'eomapund, ridede e ton itemb moina esoulita yit imjas da "Iminjog"? Ma ita. Mop nokip ton maka wumir yokas nangga yit na re man apureninyit.

¹⁷ Si nangga ma ji rada man b'obogil e Godind siteket yit yomnyit, aji onggityam moina opureni yitkakit maka danda yokau utkunda rigam wumir okatam. ¹⁸ I kon b'ogla Godind siteket yit yamnin, nokip kon wumirjog riga en b'engabenga yit opurenam aji win komkesa re ma ngai wumirjog im.

¹⁹ Aji kon singi en koina gar ke wumir okati paib (5) yitkak tapureninyin sosind riga ouyaenam, aji kon ma singi en wumir okati kesa ten tausin (10,000) yitkak tapureninyin b'engabenga yit opurena ke.

²⁰ Kor nany dide yingganwar! Goro b'iga sobijog pila multekip tengaeninam odede ukoi gasa wumir okatam, aji win b'ogla rigajog pila na multekip b'obogil tengaenindam danda kima wumir okatenam. Aji win b'ogla papa b'iga pila na nony kesa taukindam negirjog mile omnika gatabim.

²¹ I yina peband ija emb ji iriki yibim da, "Yonggyam yindeny da Kon opimemb Israel riga yit tamneninyin dem ra

b'enga yit kaim dide b'enga kantri rigaina tugim kaim.

Aji nangga ma ji ra kon odede nya ke ten yit tamneninyin, ton makwa ita ken yit nutkundenyi dem."

²² Si ket b'engabenga yit opurena re ma gar ke utkunda riga towanim Godimna danda ongwatam mal e, aji gar ke utkunda kesa riga towanim mal e. Aji bage yit opurena re ma gar ke utkunda kesa

riġa towanim Godimna danda ongwatam mal e, aji ġar ke utkunda riġa towanim mal e. ²³ Si onggit paemb ra kupka sosit yipand b'eoma okas dide ra komkesa riġa b'engabenga yit opurena teyenanj, aji ra b'engabenga yit opurena gatab wumir okati kesa riġa o ġar ke utkunda kesa riġa b'itgarkanj onggit b'eomapu wa, si ma ton opima opurena teyenanj da “Win korirkorir im”? ²⁴ Aji ra komkesa riġa bage yit opurena teyenanj onggit b'eomapund, dide ra ket ġar ke utkunda kesa riġa o wumir okati kesa riġa demb de b'itgarkanj, si opimemb komkesa towaina bage yitkaki opima towaina ġar takatenanj da, “Sin re negir mile riġa im.” I kwa onggit yitkakupim towaina ġar tajgatenanj ra ikalnena mim. ²⁵ Si kwa onggit yitkakupim komkesa towaina ġarind wigawiga egurki mile pita wa tapekanj, i ingkaim ket ton as irouki sap totekanj dide Godind ewangai, ngirpu ton ket pitakipind b'atgenairanj da, “God re iminjog wa wingir nate yibim.”

Yiyag Wurar Ingaenam B'ogil Nya Sosind

²⁶ Ġar ke utkunda nany dide yingganwar! Si kon ridede e nitindenjin? Ra win yipand b'eomkena tuwenyit yir opmitenam, riġa yipayipap odede mile imemb omnika eyenanj, opi re Godind ewangaya ġer, i God ma yit ouyaena mile, i Godimna ouyauki yitkak pita omnena mile, i b'engabenga yit opurena mile, i dide b'engabenga yit engendurkena mile. Si win b'ogla onggityam komkesa mile tamnikindam sosi danda okaenam. ²⁷ I ra onggit b'eoma wingirind b'engabenga yit opurena teyenanj, si win b'ogla nimog riġa o ra

jogjog nowa riga tabagikindam opurenam. Aji pipmet na b'agona wowen yipam naska yipam ti yimta, i ket yipa rigat b'ogla towaina opureni b'engabenga yit tengendurkeniny. ²⁸ Aji maka ra engendurkena riga ibim, si ton b'ogla mumakesa waken sosind. Aji ton b'ogla b'engabenga yit rapureninem towanim nenam dide Godim pilwa. ²⁹ I kwa nimog o nowa bageyamip b'ogla bage yit rapureninem. I ninda komb rigap ket b'ogla onggit bageyam waina opureni yitkak b'obogil ikalnena kima remjateninem. ³⁰ I ra yipa bageyam bage yit opurenand ibim, aji daka yipa bageyam yete re ti wusind omi ti yibim, ra ton Godimna ouyaukuri yitkak takasiny opurenam, si ton onggityam ouyaukuri yitkak naska rapurenin, aji naskanyam opurena bageyamit mumakesa rau. ³¹ Si win komkesa ririr im bage yit opurenam yipam naska yipam ti yimta, nokim da idenat komkesa riga onggit komkesa bage yitkak ke b'auyaena okatenyi dide b'ugowa yit takatenanj danda okatam. ³² I ra bageyamip bage yit opurena teyenanj, ton b'ogla towalenggyam b'agoka wowen komkesa sosim b'ogilim. ³³ Mop nokip God re ma nenegir nya ke isanikesa b'ingaena God e, aji ngimbla kima God e.

Si komkesa yina rigap b'ogla komkesa sosi wingirind odede b'ogil nya ke mile ramnikinem. ³⁴ I konggap b'ogla mumakesa tekeny sosi b'eoma wingirind, mop nokip itmikitijog rigap ma opima ten enjikenanj yit opurenam b'eoma wingirind. Aji ton b'ogla b'atkauranj odede ringma re gog yitit yindeny. ³⁵ Aji ra ton singi taukanj wumir okatam ninda gasa gatabim, ton b'ogla rarkeninem towa

leowar towaina metind. Mop nokip itemb re ingar kima e kongga wa yit opurena sosind. ³⁶ Si rika Godimna yitkak wa pilkena b'atobarkonj? O rika Godimna yitkak wa pilwa nena mana ikonj?

³⁷ I yet ra tilenggyam b'itimjas da ton re bageyam e o Yinayina Wingawingamna yiyag wurar okati riga e, si ton b'ogla wumir yakat da yitkak rinsim re kon wanim erikinyin re Yonggyamimna b'ingawa yitkak im. ³⁸ Aji yet ra opimemb koina yitkak b'itisainy, si God daka ita tin isai. ³⁹ Kor gar ke utkunda nany dide yingganwar! Si onggit paemb win b'ogla uko i singi kima na tuwenyit bage yit opurenam. Aji win goro riga ogoka teyeninam b'engabenga yit opurenam. ⁴⁰ Si komkesa gasa raukinem dindim omnika ke dide b'ogil omnika nya ke.

15

Kerisomna Utnyita gatab Yit

¹ Gar ke utkunda nany dide yingganwar! Kon wen nonony tamninyin ra God ma onggityam b'ogil yirkokar bage yit gatab e rina re kon wa pitapita amnenawond, i kwa rina re win gar ke utkunda ke yokatonda, i kwa daka rokasim re win dikind danda kima owinki wekenyit. ² I ra win God ma onggityam b'ogil yirkokar bage yit danda kima tamorkindam rina re kon wa pitapita amnenainond, si win yirkokar yokasya re onggit yit kae. Aji ra win maka ra gar ke utkunda oramisya onggit yitkakim pilind, win gar ke utkunda yoramisy re yirkokar kesa gasam pilnate. ³ Mop nokip ukoijog re kon naska wa akainond onggityam yitkak ririr

nat rina re kon akasinond Yonggyamim pilke. Si ija emb ji yitkak da Keriso meraina negir mile mapena uj awonj odede rija e re yina pebat yindeney Ti gatab. ⁴ I kwa ija emb ji yitkak da rigap Tin yeungito i Godit Tin yutnyitonj nowam bibirind odede rija e re yina pebat yindeney Ti gatab. ⁵ I Ton ket pita awonj Kepam pilwa kwa yipa nyi da Petro, i onggit kak ke Tina twelp (12) itmikitijog riga wa pilwa. ⁶ I onggit kak ke Ton kwa pita awonj re yipaina win nat paib andred (500) i kwa ninda tumind gar ke utkunda riga wa pilwa. I towa wingirind jogjog riga re opima wimena wuweny ngirpu yu, aji ninda re kea uj aukito. ⁷ I onggit kak ke Ton kwa pita awonj Ti yinggan Yakobom pilwa, i ket kwa komkesa Tina itmikitijog riga wa pilwa. ⁸ I kikitumamjog Ton kwa ket pita awonj kor pilwa yet re yimtajog itmikitijog riga awond odede wip ringma ra b'igat maka tina win ririrind tukenj. ⁹ Mop nokip kon kolenggyam re itmikitijog riga wingirind sobijog riga en. I kon ma ririrkipjog riga en onggit itmikitijog riga nyi ke ogenayam, nokip kon kea Godimna sosi negir ma b'idgotnenand yoramitenond. ¹⁰ Aji Godimna wurarte odede rigam ken nomnonj it re kon yu itmikitijog riga nibnyin. I itemb Tina wurar rina re kornim awonj re maka kip kesa awonj. Aji onggit komkesa itmikitijog riga wa wingirind kon nenat ukoijog b'asowa yokatenond. Si ma konit aji Godimna wurarit rinte re kon kima yipand yibneneny. ¹¹ Si onggit paemb kon dide onggityam ninda itmikitijog riga, sin intemb ji yipaina God ma b'ogil yirkokar bage yit pitapita yomnenyu, i intemb ji kwa win gar ke utkunda ke yokasya.

Gar ke Utkunda Rigaina Utnyita gatab Imjatam Yit

¹² Si sin kea Kerisomna b'ogil yirkokar bage yit pitapita omnena yiyenyu da Ton re kea uj ke utnyitonj. Si ridede pae wa wingirind ninda rigap endenanj da uj riga ma opima tutnikanj dem? ¹³ I rada uj riga ma opima tutnikanj dem, si Keriso daka maka utnyitonj. ¹⁴ I rako Keriso maka utnyitonj, si meraina pitapita omnena yitkak re keako kip kesa na, i dide waina gar ke utkunda re kwa keako kip kesa na. ¹⁵ I kwa daka rigap sin, itmikitijog riga, nongwatananj da sin re b'anyginena yir ungata riga im Godim gatab. Mop nokip win kea pitapita yommenonda da Godit Kerisond yutnyitonj uj ke. Si rada uj riga ma opima tutnikanj, keako God todaka maka Kerisond yutnyitonj uj ke. ¹⁶ Mop nokip rada uj riga ma opima tutnikanj, si Keriso daka maka utnyitonj uj ke. ¹⁷ Si rada Keriso maka utnyitonj, waina gar ke utkunda ra kak im tekeny. Si win ra indaima waina negir milend tekenyit. ¹⁸ I kwa daka uj riga kea negir aukito yepiya re Kerisond gar ke utkunda ke yokato towaina yilo winind. ¹⁹ I ra men Kerisom pilind warim b'ogil isma oramisu onggit gowukoi b'ogil yirkokar wimena nenam, si men re ukoijog kear kima riga im komkesa gowukoi riga wingirind.

²⁰ Aji Keriso iminjog kea uj ke utnyitonj dide naskajog utnyita riga na awonj. Si Ton re iminjog mal e da komkesa gar ke utkunda uj riga opima tutnikanj dem Ton re dide. ²¹ Mop nokip uj b'atomonj re yipa riga Adamim pilkena, aji uj riga utnyita daka b'atomonj re yipa riga Kerisom pilkena. ²² Si komkesa riga uj auka wuweny re

Adamimna uj nya nasim, i kwa ija ima yipa wip nya ke daka komkesa riga yepim re Kerisond gar ke utkunda ke yokasi, ton tutnikanj dem ra Kerisomna utnyita nya nasim. ²³ Aji opimemb komkesa yipayipa riga utnika tuweny ra dem towainajog win nasim yipa naska yipa ti yimta, si naskajog re Kerisote, i onggit kak ke ra tonpim yepiya ra Kerisom pilind tekeny Tina itendapu winind. ²⁴ I onggit kak kaemb ket undwatapu win ik dem. Si onggit winind Keriso ket Abu Godim okau dem pumb tungg. I dide onggit yipaina winind God kwa negir tamnikiny dem komkesa Satanamna wip omnena danda, dide komkesa gowukoi b'engabenga danda yepim re geja omnika yiyenyi yina riga kima. ²⁵ Mop nokip Keriso b'ogla king rain dem ngirpu ra God komkesa Kerisomna geja riga taramisiny dem Tina pis wirand danda ondratenam towa kumbind. ²⁶ I ket Ton Tina kikitumam geja riga, uj na eomneny dem. ²⁷ I yina pebat Kerisom gatab yindenya da, "God opima komkesa gasa taramisiny Tina pis wirand danda ondratenam towa kumbind." Si onggityam yit yisipkis re da God Tilenggyam opima komkesa gasa taramisiny. Si onggit paemb men pitakipind wumir yokasya da God re ma ita onggit komkesa gasa wingirind b'inkis. ²⁸ Si ra God komkesa gasa Kerisomna danda wirand taramisiny dem, si B'iga Tilenggyam ita b'atkaeny dem B'u Godim pilwa yet ra komkesa gasa taramisiny Tina danda wirand. Nokim da idenat God Yonggyam ibim kupkakupka komkesa gasa wa.

²⁹ I ninda rigap baptiso yokatenyi towanim mim

yepiya re uj aukito. Si ra ton maka ra warim b'ogil isma yir ungai, si ton nangga paim onggityam wiko yomnikenyi? I ra uj riga maka ra ngai tutnikanj, si nangga mop paim ton towanim baptiso yokatenyi? ³⁰ Si sidaka ringmim? Nangga paim sin ita winind sowaina yirkokar esingkandenindam God ma b'ogil yirkokar bage yit pitapita omnena map? ³¹ Gar ke utkunda nany dide yingganwar! Kon wa gatab b'asourena yokatenyin re mera Yonggyam Keriso Yesum wip nate. Si kon wanim iminjog e nitinjin da kon uj e wip yowarkenenyin bibir weanjweanj God ma b'ogil yirkokar bage yit pitapita omnena map. ³² I re kon Epeso taunind nibnond God ma b'ogil yirkokar bage yit pitapita omnend, ma yipa kima onggit taun rigapiya tibam b'angga pila igmarento kor pilwa bebig kima b'idgotnena oramitam. Si onggit winind rako kon rigaina nya ke b'ikenond onggit bebigin pilke ewaikitam, si nangga b'ogil na rako kor nibnau onggit mile ke? Rada uj riga ma opima tutnikanj, men b'ogla odede nenjinum da, "Yu men diyam aenand wakenin dide nyi onaikand wakenin, mop nokip men mep im uj taukindam." ³³ Si goro yet wen b'anyginena wa wip ramnenin! Nokip ra win wa rigawar kima b'itinkenindam, si opimemb wa rigawar wingirind ninda negir rigap opima wen b'ogil mile ke negir kaokao mile wa wip tamnenanj. ³⁴ Si win nony epangkinam negir kesa dimdimjog mile omnikam! I goro negir mile tamnikinam! I wa wingirind ninda riga makwa wumir im Godim. Si kon nindenynin re wanim ingar ma.

Utnyiti Ji gatab Yit

³⁵ Si ninda rigap amaya b'ogil im tendenanj kor pilwa da, "Ridede im uj riga tutnikanj dem? I ridede wip ji kima im topekanj dem?" ³⁶ Si korirkorir riga, win opima tuny igmarka eyenenindam. Aji ra opimemb tuny gim uj taukanj, i ton ket opima pok tikkanj. ³⁷ I win ma insim nangg bigil kima itot eyenindam, aji jaba tuny nena im igmarka eyenindam, rika kini tuny im o ninda b'enga tuny im. ³⁸ Aji God re Tina singi ririr nate onggit tunyim bigil omnikau. Si ingkaimemb yipayipa tunyip towainajog bigilim b'etingkanj. ³⁹ Si komkesa yilo gasa waina ji re ma yipaina wip ji im, aji b'engabenga wip im. I riga wa re towada b'enga wip ji e, i b'angga wa towada b'enga e, i ngena wa towada b'enga e, i dide kabum wa towada b'enga e. ⁴⁰ Si b'engabenga wip ji opima wekeny de pumb tunggind dide onggit gowukoyind. Aji pumb tunggimna ji re towada b'enga wip b'ogil inyomarena kima e, i dide gowukoyimna ji re towada b'enga wip b'ogil inyomarena kima e. ⁴¹ I lomkonggam b'ogil inyomarena re tida b'enga e, i mobim b'ogil inyomarena re tida b'enga e, i dide iki wa b'ogil inyomarena re towada b'enga e. I kwa yipayipa iki towaina b'ogil inyomarena re daka b'engabenga im.

⁴² Si ra uj riga tutnikanj, si ija imemb ji towaina ji b'engabenga wip taukanj dem. Si ra men uj auka tuwenyin ngirpu rigap uggim euka teyenanj, si meraina ji ra gopmet nasim titkikanj odede ringmim re tuny waina gim itkikenenanj gou borand. I ra men uj ke tutnikindam dem, si

men ra itkika kesa b'enga wip ji im taukindam dem odede ringmim ra tuny bigilim b'etingkanj. ⁴³ I meraina ji wekeny re ma isnawa kima im onggit gowukoyind ngirpu rigap gop wa euka teyenanj. Aji ra men tutnikindam dem, meraina ji ra b'ogil inyomarena kima im taukanj dem. I kwa meraina ji wekeny re ma danda kima im onggit gowukoyind, ngirpu rigap gop wa euka teyenanj, aji ra men tutnikindam dem, meraina ji ra kupka danda kima im taukanj dem. ⁴⁴ Si rigap ujgim euka eyenanj re meraina gim ke ji im, aji ra men tutnikindam dem, meraina ji b'etingkanj dem wingawinga ke ji wa im. I rada ita gim ke ji yibim, si todaka kwa ita yibim wingawinga ke ji. ⁴⁵ Si yina peband daka odede yipa wip e iriki yibim da, "Naskajog riga Adam aukonj re yilo wimena riga mana." Aji daka kikitumam Adam, Keriso aukonj re Wingawinga mana yete re riga wa yirkokar ogona eyeniny. ⁴⁶ Si ma wingawinga ke riga na naska ikonj, aji gim ke riga na. I onggit kak kena ket wingawinga ke riga ikonj. ⁴⁷ I naskajog riga Adam aukonj re gowukoi sungar kena, aji nimogim riga ikonj re pumb tungg kena. ⁴⁸ Si komkesa gowukoi rigaina ji re gou sungar ke omniki im odede Adam re dide yet re gou sungar ke aukonj. Aji ra men tutnikindam dem, meraina ji taukanj dem pumb tungg rigaina ji im odede Keriso re dide yet re pumb tungg ke ikonj. ⁴⁹ Si yu men Adam pila gou sungar ke omniki ji kima im wimena wuwenyın yet re gou sungar ke aukonj. Aji ra men tutnikindam dem, men kwa opima Keriso pila pumb tunggimna ji kima wimena tuwenyın dem yet re pumb tungg ke ikonj.

⁵⁰ Gar ke utkunda nany dide yingganwar! Kon iminjog wen tamninyin da onggityam meraina mi dide kus kima gim ke ji re ma ririr e God ma pumb tungg owabintam. I itkika kima gasa re ma ita dadal ibim, aji pumb tungg re dadal e itkika kesa ibim. Si onggit paemb makwa ita yipa itkika kima gasat owabinjis dem itemb itkika kesa pumb tungg. ⁵¹ Yir de, kon itemb wigawiga yit wen wumir tamninyin. Ma men komkesa im uj taukindam, aji men komkesa, uj riga dide yilo riga, opima b'etingkindam dem. ⁵² Mop nokip ra bibol kikitum ara ikeny dem, odede sobijogjog ganggand ringma ra rigat yipapyam yirkip tosmanjis, uj riga opima b'etingkiranj dem itkika kesa ji wa, i dide ket komkesa medaka kwa yilo riga b'etingkindam dem itkika kesa ji wa. ⁵³ Mop nokip onggit meraina itkika kima gim ke jiwit b'ogla b'ekit itkika kesa dadal wimena ji. I kwa onggit meraina uj kima jiwit b'ogla b'ekit uj kesa dadal wimena ji. ⁵⁴ Si itemb meraina itkika kima gim ke jiwit ita b'itkis itkika kesa dadal wimena ji, i kwa itemb meraina uj kima jiwit ita b'itkis uj kesa dadal wimena ji. I ra onggityam win ik dem, onggit yina peband iriki yitkak ita iminjogim tainy dem da,
 “God kea uj ma danda dadal gou wa yominy.”

⁵⁵ “Uj! Rokate moina yirkokar gou wa omnenam danda?

Uj! Rokate moina riga idrikam nim?”

⁵⁶ Si ujimna riga idrikam nim re negir mile e, i dide negir milemna danda re gog yit e. ⁵⁷ I God mera Yonggyam Yesu Kerisom pilkena onggityam komkesa mile gou wa amninonj, i ket Ton mera danda nokainonj onggityam komkesa mile gou wa

omnenam. Si men Godind ukoi siteket yit yamnu!
⁵⁸ Si onggit paemb kor gar ke utkunda nany dide yingganwar yena re kon singi eyeninyin, win b'ogla danda kima towinkindam onggit yitkakim pilind, dide goro nanggamog yitit wen muma-muma ramnenin b'anyginena nya wa. Aji win b'ogla ita winind kinyir tainindam Yonggyamimna wiko omniam. Mop nokip win wumir im da ra win b'asowa tuwenyit Yonggyamimna wikond, si opimemb waina b'asowa re ma opima kip kesa taukanj dem, aji opima mira dem.

16

Godim Wulkip Oramka Mile gatab B'ingawa Yit

¹ I kon yina riga yim okawam wulkip oramka gatab yit e nitindenyin. Si kon kea Galatiya sosind onggit gatab b'ingawa yit yoramitond. Si widaka odede yipa wip nya ke wulkip oramka mile omnika teyenindam. ² Si win opima yipayipa wiko bibir wingirind wulkip imda eyenindam. Si win b'ogla onggit imdi wulkip wingirind ninda obagika teyenindam Godim pilwa oramkam. I ket win b'ogla ita Sandend yir opmita winind wulkip oramka teyenindam, ngirpu bobo tamnikindam ongapam. Nokim da idenat win maka kor liyal wulkip oramka teyenindam dem ra kon netken wa pilwa. ³ Si ra kon netken dem wa pilwa, win waina nony ijai riga na tabagikindam dem. I kon ket opimemb waina obagiki riga tetmikisinyin dem koina peba kima. Si tonpimemb ket onggityam waina ongapi wurar wulkip eiranj dem de Yerusalem taun wa. ⁴ Aji rada itemb re

b'ogiljog e kornim daka menonim ton kima, si ton toko kon kima wou dem.

Polimna Isamki gatab Yit

⁵ I kon ita menon okatenyın Makedoniya eriya nata. I onggıt kak kaemb ket kon netken dem wa pilwa. ⁶ I kon ama rıka win kima sobijog pinjog e ngai nitibnyın dem, o rıka kon ama de gıbil win undwasın dem. Nokim da idenat win yım notkaenya dem nyawınd ingaena gasa ke i ket nitmikisya dem ritata ra kon menon okasin. ⁷ Mop nokıp kon ma singi en nyatnyata wen yır on-gongım sobijog ganggand, aji kor ita singi sobijog pinjog ngai wımenam win kima rada Yonggyam ita nitinjikis dem. ⁸ Aji kon kwa indama nitibnyın Epeso taunınd, ngırpu ra Pentikos diyamdiyam win okas dem. ⁹ Mop nokıp God kor mora ukoi kana nipangendau kornim danda kima Tina wıko omnıkam dikınd Epeso taunınd, aji jogjog rigap ken opima negir omnam il ongka niyenyi.

¹⁰ I ra Timote ik wa pilwa, win b'obogıl yır ipkya, nokim da idenat ton moga kesa win kima ibım. Mop nokıp ton Yonggyamımna wıko e omnıka yiyeny odede koda re dıde. ¹¹ Si onggıt paemb win goro somop ke tin yır ongya dem. Aji ra ton menon okas dem, win b'ogla tin yım usmurena iyenya dem tinım nyawınd ingaena gasa ke dıde ket itmikisya ngımbıla kima kor pilwa menonim. Mop nokıp kon tina yır yungaen nında gar ke utkunda riga kima opendam.

¹² I kon kwa ket gar ke utkunda yinggan Apolom gatab nitındenyın. Kon jogjogpyam tin yugoenond menonim wa pilwa nında gar ke

utkunda nany dide yingganwar kima. Aji ton yu makwa ita singi aeny menonim. Aji ra tinim b'ogil win tainy, ita ton menon okas wa pilwa.

Undwatapu Yitkak

¹³ I win yir kima wekene, i danda kima owinki wekene gar ke utkundand, i rigajog pila moga kesa mile amnikina, i dide jijab kima wekene.

¹⁴ I win b'ogla singi b'iyena kima komkesa gasa amnikinam!

¹⁵ Gar ke utkunda nany dide yingganwar! Win wumir im wekenyit Stepana b'ubigawar gatab da ton re naskajog gar ke utkunda riga na aukito Akaya eriya wingirind. I dide ton ket towaleng-gyam b'abagento yina riga wa wiko omniam. Si kon wen tugoinyin da, ¹⁶ widaka b'atkaindam odede riga wa pilwa dide kwa komkesa riga wa pilwa yepim re yipand gilgil God ma wiko omnika eyenanj dide b'asowa wuweny onggit wikond. ¹⁷ I opi re waina obagiki riga, Stepana i Portunato i dide Akaiko, i ton kea ken nodarmi, i dide tonpiya ket waina bebig gatab kombkomb wiko ririrkip yomnyimi. Si onggit paemb kon sam aenyin.

¹⁸ Si ton kea ken dide wen gar ngimbla nomnito. Si onggit paemb win b'ogla odede riga b'obogil isnawa teyenindam.

¹⁹ I sosi rinsim re wekeny Asiya eriya wingirind wen widaemb yit amnanj. I Akwila ake Priskila molkongga yipand onggityam sosi riga kima yepim re towaina metind b'eomenenanj, ton gar ke widaemb yit amnanj Yonggyamim nyi kima. ²⁰ I kwa komkesa gar ke utkunda nany dide yingganwar yepim re wekeny

dikind wen widaemb yit amnanj. I win b'ogla walenggyam walenggyam simesime taenindam yina b'amongnena kima.

²¹ Itenemb kon Pol, konsim koinajog yim ke wa widaemb yit erikainyin. ²² Si yet ra maka Yonggyamind singi iyeny, si ton negir sake yakat! *Marana ta!* —Metkim ayo, sowa Yonggyam! ²³ Yonggyam Yesumna wurar win kima! ²⁴ I koina singi komkesa win kima Keriso Yesum nyiwind, iminjog!

Wipi Yit God ma Yina Sisil Yina Peba
The New Testament in the Wipi Language of Papua
New Guinea
Nupela Testamen long tokples Wipi long Niugini

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

PDF generated using Haiola and XeLaTeX on 21 Feb 2024 from source files dated 31 Aug 2023

a5a5213a-fb12-52b5-9c99-efb8044c6646